



中復堂全集

五

和
854
5



東溟文後集卷之四

桐城姚瑩石甫著

海外廳縣津貼公費狀 辛丑八月

道光二十一年八月初四日奉道光二十一年五月二十
五日憲牌奉 上諭大理寺少卿金應麟奏閩省積弊

請旨籌議一摺據稱該省沿海要區缺多疲累當於舊章
之中量爲變通使材能之士無所畏蒞不肖之徒無以藉
口等語州縣爲親民之官地方多一疲累之員不獨民間
隱受其害卽公務亦必多貽悞著顏伯燾劉鴻翱卽將摺
內所指各條悉心查議是否可行據實具奏原摺著抄給
閱看將此諭令知之欽此查閩省沿海要區素稱難治最
苦各縣辦公需費經本部院下車之始卽札飭司道設法

東漢文後集卷之四
籌畫俾資津貼未據具復合行札飭札到該道立即遵照
查明海外四縣是否無須津貼有無閒曹堪以裁汰臺屬
同知通判中缺分甚多應酌提公餘銀兩若干以資津貼
務即體察情形通盤籌畫尅日妥議通詳以憑覆奏總不
以臺灣津貼內地亦不以內地關餘津貼臺灣查噶瑪蘭
有應陞科田地現因防夷暫緩辦理或即以此項爲津貼
不必裁汰閒曹酌提同通公餘一併籌畫務期盡善奉此
伏查臺灣孤懸海外民情不靖時防亂萌各廳縣事勢較
之內地尤爲亟切若不使之辦公有資不但不肖者因之
掎克激生事端即賢能之員亦無從展布誠如 上諭
公務必多貽悞 聖明洞及隱微實乃求治之大本防
亂之大源也復蒙憲示以噶瑪蘭應陞科田畝或即以爲

津貼不必裁汰閒曹酌提同通公餘飭道籌畫下懷不勝
欽服謹查臺灣廳縣最疲累者無如嘉彰二縣缺本非優
兼之亂民屢作盜匪極多鳳山次之夫治臺首在防亂防
亂莫先緝匪而緝匪非賞不行獲辦後又苦遣解內地渡
海配船之費每捕一要犯自數十金至數百金不等而起
解內地每名需費亦四五十金計每縣年閒應捕匪犯多
者百餘少或數十止此一事所費已數千金矣勤奮者無
非虧挪官項懼累者則以有勘無捕或捕而不辦即辦矣
而遲久不解甚乃入于交代前後互推苦累情形不堪言
狀誠非有以津貼之不可同通之中惟淡水鹿港二廳爲
優淡水係地方官本有緝匪之責幸官穀無多雇運賠費
有限而每年臺鎮北巡攜帶重兵往來十餘站夫馬之費

輒數千金較他屬尤鉅鹿港自奉新例以來每年配運官穀不足雇船專運所費亦鉅至臺防一廳自鹿耳門廢後商船不前久已疲乏近又每年雇運官穀多者萬餘石少亦數千石五廳之中辦公最爲竭蹶其差堪自給者惟澎蘭二廳臺灣一縣而已此皆公餘無可提者若閒曹則臺屬大小各員無非緊要實無可裁堪爲津貼茲督同臺府熊守查明有噶瑪蘭廳民人續墾東西勢田園道光十七年經通判李若琳文明堪以陞科上則田園一百六十餘甲下則田園一千七百二十餘甲照蘭廳則例年可征租三千八百餘石因民人對冊領單未竣尙未詳報陞科又彰化縣藍興莊自嘉慶九年詳丈張景行等四戶未陞田園二百二十餘甲現亦墾成年可征租四百餘石因業佃

互控糾纏延未報陞以上未陞田園共二千一百餘甲在

天朝賦則久定原無需此有限供租若以爲緝匪解犯充公則於地方大有裨益又查彰化縣有水沙連一處民墾番地乾隆二十年奏請歸公部議行令將應征之租扣完供粟造入地丁奏銷外其應征耗銀及餘租造入公費冊內至今水沙連額征供穀二千餘石久入奏銷獨餘租一款年當征穀八百餘石民欠多少不等皆存貯本倉自乾隆三十七四十三三年皆經詳報變糶五十二年林逆之亂穀盡無存五十三年至嘉慶二十四年積穀除清釐案內變糶一萬二千五百石外又糶穀八千八十餘石道光三年藩司詳請變糶前憲孫以糶價減少批駁道光十二年張逆案內續詳變價墊用軍需及民欠外現在倉穀

尚三四千石此穀本係公費但未指明何項公用又未明定糶價以致詳案屢駁轉成延擱似宜照從前糶價酌定每石變銀六錢四分除車運費二分外以六錢二分定價奏請同噶瑪蘭及藍興莊未陞科田園一併畱爲臺地緝匪之用以上三款年額租穀約五千石令該地方官實力征收變價解府報道除民欠外實征解銀若干作爲五分嘉彰二縣各給二分鳳山縣亦給一分以爲津貼緝匪解犯之用明定章程以免冒濫俟每年征解支給截數隨同奏銷專款報明藩臬二司并請憲臺衙門察核事屬外辦且係爲沿海要缺瘠累查議變通應請奏明免其造册咨部以省往返駁詰之煩是否有當謹遵札查明議覆伏乞
督核施行

噶瑪蘭東西勢續墾及彰化縣藍興莊未陞科田園同彰化縣水沙連餘租充公倉穀三案分款摘敘簡明清摺呈送察核

一噶瑪蘭東西勢續墾田園一案緣蘭廳初開原報堪墾埔地七千餘甲限年墾成陸續報陞至道光五年奏定賦則外尚餘一千數百甲非傍山沙礫卽近濁水大溪衝刷靡常久未墾成經前督憲趙奏准部行該地方每年結報一次其中亦有已墾成田園者每年照下則例止征供耗免納餘租因荒熟不常恐一經陞科諸多窒礙且蘭地初開孤僻遠在山後一旦有警山前難以策應是以議定其穀存貯廳倉報明道府以備地方不時公用迨後道光三年蘭廳小夫械鬥之案除動用餘租變價之外前通判薩

廉卽以此款撥湊經詳報院司有案其後省中不知臺地情形及前人所以畱存以備不虞之意因道光七年以後該廳停未結報屢次檄催造報陞科延至十七年署通判李若琳遂通稟設局丈量報陞經已文明尙未填單造册卸事奉院批令一手經理二十年八月後始將田園圖册造具一分送道其通送之册尙未造齊各佃民因有康隆控案亦被其搖惑把持延不赴局領單李倅卽病故康隆控案本年甫經解省尙未訊結此項田園是以延未報陞之原委也查據李故倅所造册內其所丈過東西勢田園除撥充書院膏火及隘地丁糧之外堪以陞科上則田一百五十五甲八分零上則園一十甲五分零下則田一千五百九十六甲二分零下則園一百二十九甲三分零通

共上下則田園一千八百九十二甲零分別征收租穀年可三千八百餘石每穀一石變價六錢四分除車費二分外可折番銀三千四百元

一彰化縣藍興莊未陞科田園一案緣嘉慶九年彰化縣詳文報各戶未陞田園一千九十一甲六分二釐零內除南北路兩營承管未陞田園一百二十二甲八分五釐八絲又藍日晃未陞田園二十一甲四分九釐該戶久經身故又藍元枚未陞田園三百九十五甲七分六釐八絲四忽七微歷年係管事來臺收租更易多人彼此推諉以上三戶未陞田園五百四十甲零同水冲拋荒田園二十一甲七分二釐請分別扣除另辦外實只現管張景行等七戶未陞田園五百二十九甲八分四釐俱在藍興莊界內

先將丈過張必榮張永隆蔡文俊三戶田園共三百零六甲二分已入嘉慶九年題陞外尚有張景行田七十二甲七分五釐園五十一甲五分五釐蔣玉麟田五十一甲二分七釐園十八甲八分零蔣昆成田一十七甲八分零蔣大沛田一十一甲零以上四戶田園共二百二十三甲一分七釐零尙未造冊報陞或業佃互控糾纏或業戶身故皆以陞科冊費無出延擱至今屢奉檄催不能造報定案一彰化縣水沙連公費餘租一案綠水沙連本係番地彰化設縣之初并無供賦及後民人續墾乾隆十六年始奏請歸公二十年題准照官莊例征租概收本色在本地建倉存貯俟應糶之時發糶解價充公并准部議行令將應征租粟除扣完正供造入地丁奏銷外其應征耗銀及餘

租造入公費冊內報部查核至今彰化縣奏銷遵照辦理其餘租一款年額八百餘石民欠多寡不等皆存貯本倉乾隆三十七年四十三三年皆經詳報變糶五十二年林逆之亂穀盡無存五十三年至嘉慶二十四年積穀又多清釐案內變糶一萬二千五百石外又糶穀八千八百八十餘石道光三年藩司詳請變糶奉前撫憲孫批數十年前糶價每石皆在七錢以上而司詳現在糶價只六錢三分二釐以爲減少駁飭不准且令將清釐案內不敷糶價著落追賠至今憲檄頻催無從申覆道光十二年張逆案內續詳變價墊用軍需及民欠外現存倉穀約三四千石查此項租穀原案本係充公但未指明何項公用又未議定何時發糶價定若干以致孫前憲爲此駁飭復令追賠數

十年前清查不敷之價府縣至今莫能登覆轉以有用之穀爲貽害之端以上三款皆臺灣多年積案蘭廳未陞科田園職道於道光十八年二十年屢言於鍾鄧二前督憲請畱爲臺屬緝匪之用已蒙覆書允俟民人領單詳報入奏永沙連充公租穀一事本年職道議覆憲臺督憲札行民人條陳瑯嶠水沙連等三事案內請專以緝匪尙未奉憲批茲又查出藍興莊一款并蒙憲臺深悉蘭廳未陞科田園堪以備用津貼儻蒙一併入奏必邀 俞允不獨臺屬緝匪有資大益于地方吏治抑且銷去積案三宗可免案牘之煩及報部之費蓋積案之由多爲費無從出今昔不同艱窘日甚苟能俯卹下情則仁人之利溥矣至歷年以來三案內已征租穀或已經變難有案或現存在倉或經上年防夷案內提用所有現存者容俟查明畱爲臺地防夷案內例不准銷之費其十八年未征民欠一概免追更沐憲恩無旣

爲楊雙梧鄭六亭請祀名宦狀 辛丑三月

竊見前臺灣道楊廷理乾隆年間由臺防同知辦理林爽文逆案數有戰功洊升臺灣府道功德在民至今歌頌嘉慶十五年開設噶瑪蘭廳其議倡始於廷理屢爲時議所阻卒竟成之規模章程皆一手始終其事以爲人剛直見忌設廳事竣未及議敘偃蹇抑鬱而終今蘭廳開設已三十年士民樂利益思其功不已又前臺灣縣學教諭鄭兼才學問品行乾隆嘉慶間名重一時歷任內地及臺灣學官皆善於其職尤以敦實學崇名教爲己任畱心時務地

方利弊知無不言從而行之皆有實效道光二年前督府趙文恪公奏祀鄉賢祠今卒已二十年臺人猶頌仰之現據臺地紳士僉呈請以二人入祀名宦考德徵功洵為無愧臺灣府熊守據情分別具詳職道思廷理之功兼才之德皆可信今傳後伏乞憲臺俯採羣言早為題奏俾邀榮典洵足以示大公而為有職者勸則感荷仁明不特臺地人士及兩姓子孫而已楊有子立冠嘉慶己巳庶常早卒現惟一子立先江西候補縣丞鄭二子一為諸生一讀書未成兩家皆貧甚子孫並無現任九卿官者二人各有遺刻一種並以附諫乞賜垂覽

請覆奏臺灣文武議敘狀 辛丑三月

道光十八年九月臺灣南北兩路匪徒滋事當即撲滅十

一月中路胡布復起攻汛戕弁十九年二月竣事奉旨以胡布案辦理妥速達鎮及瑩皆予從優議敘命查在事文武出力人員由鍾前憲酌量保奏旋以鍾前憲去閩復奉命督撫會奏其南北兩路之案亦經部議請查出力人員奏予議敘奉 旨俞允是此事先後仰荷 恩綸固非常比瑩遵同達鎮查明出力文武分案造冊稟送因大憲迭更飭司查議寢延至今 天澤久屯輿情喁望甚殷臺灣孤懸海外亂民間作全賴賞勸有功庶能驅策羣力今鎮道已蒙議敘而將吏義士寂然久之實無以對羣下伏思上年廈門防夷將吏再蒙恩賞有差事在胡逆之後獨十八年之賞未行似於慎重海外策勵有功之道猶有未盡瑩屢思陳情以述近市恩未敢冒昧今幸憲臺廓然

大公獎善旌能如恐不及楊廷理三十年前故員猶衰顯於其身後豈現在効力轉沒微勞第案貶憲轅恐行次夷務倥偬無人舉告瑩若復避嫌緘默心實不安伏祈飭檢前案迅予核辦俾海外將吏士民咸知恩不忘遠必益鼓舞歡呼羣思用命矣

臺灣水師船礮狀 庚子六月初一日總兵會銜

竊照臺灣孤懸海外口岸處處可通去年粵東查辦夷船甚嚴本職恐其竄入臺洋卽飭水師守口各營廳縣嚴密巡防前委前任鳳山縣知縣魏瀛赴各處會同廳縣營將查勘礮臺修整在案本年五月十九日奉憲臺會札以內地查辦嚴緊奸夷勢必趨入臺地飭卽整備哨巡船隻配齊礮實力巡緝一遇夷船卽認真轟擊勿任停留潛消

鴉片等因又經飛飭各屬遵照辦理本職因南北沿海一

帶地廣且長口岸紛歧稽查舊案惟淡水雞籠大口曾有夷船寄碇餘皆淺水不能進口但沙汕變遷靡常今昔情形各異何處水深可泊夷船何處水淺可以無虞何處應設守口船若干隻巡哨船若干隻大小礮位若干弁兵若干自應委員逐一勘驗調撥妥洽責成本管水師營縣及守口員弁巡防夷船駛至卽先行封港不許小船竹筏出口以斷接濟水米偷消鴉片之路督令守巡哨船隨機應變合力轟擊庶幾有備無患免致臨時掣肘當委前署蘭廳閩浙鎮標左營游擊洪志高赴鹿港以南委淡水同知劉繼祖艦艍營參將邱鎮功赴鹿港以北將各處口岸核實勘辦茲查明郡地鹿耳門已經淤廢水深不過數尺鹿

耳門迤南安平大港及南路鳳山縣屬之東港水深一丈一二尺鹿耳門迤北臺嘉交界之國賽港水深二丈一二尺北路嘉義縣屬之樹苓湖卽五條港下湖水深一丈七八尺彰化縣屬之鹿港卽王功港水深一丈一二尺番仔挖水深一丈四五尺至一丈七八尺五汊港水深一丈淡水廳屬之滬尾水深一丈八九尺惟極北大雞籠水深二丈四五尺最爲寬深其餘小口皆不過丈餘其臺澎艦艚水師各營額設戰船九十六隻內除已屆應修尙未駕廠及在道府廠已未興工外現在臺協中營操駕大同安梭三隻中小同安梭六隻大白底艚一隻小白底艚三隻共十三隻左營操駕大同安梭三隻中小同安梭二隻大白底艚二隻小白底艚三隻共十隻右營操駕大同安梭一隻中小同安梭七隻共八隻

隻中小同安梭三隻大白底艚三隻小白底艚三隻共十四隻澎湖左營操駕大同安梭一隻中小同安梭九隻共十隻右營操駕大同安梭一隻大白底艚三隻小白底艚一隻現又修竣小同安梭二隻共七隻以上在營操駕大小戰船共六十二隻其礮位除陸路諸營及存城配用外水師營配用之礮安平中營現存二千斤一千五百斤大煩礮二十位一千斤八百斤中煩礮十一位五百斤三百斤小煩礮二十三位左營現存鹿港局二千斤一千五百斤大煩礮各四位一千斤中煩礮九位八百斤中煩礮五位五百斤三百斤小煩礮十三位左營現存安平局大煩礮十一位中煩礮十六位右營現存大煩礮二十六位中煩

礮八位小煩礮二十位以上安平協三營共堪用大中小礮一百五十位又大小礮十九位皆不堪用其澎湖協艦舩營礮位查明另報現令各營每大船一隻派千總或外委一員管駕帶兵四十名配大礮二位中小礮四位小船一隻派外委或額外一員管駕帶兵三十名配中小礮四位火藥鉛子籐牌鳥鎗刀械足用各以將備統領分爲兩班一班守口一班巡洋計日調換以均勞逸一遇夷船隨時相機合力轟擊本職職道伏查各營戰船礮位尙足配用以資巡守或有不敷亦可隨時添雇商漁船隻應用惟臺營大船以大號同安梭爲最比內地集成字號皆小較之夷船更形矮小安放礮位如一千斤以上卽覺過重船身礮力皆不足以取勝誠爲費手全賴水師弁兵操練精強以期遇敵必克除督飭水陸眾營及廳縣分別加意勤練小心巡防外謹肅復

夷船初犯臺洋擊退狀

庚子六月二十三日

六月十八日申刻據鹿耳門汛口稟報本日未刻瞭見雙桅夷船一隻由西駛至鹿耳門外馬鬃隙深水外洋遊奕本職職道立卽督同臺灣府知府熊一本面商出示封港委候補府經歷縣丞龐裕昆持令同水師所派署左營千總李瑞麟督帶兵役坐駕漁船赴鹿耳門以北國賽港沿海一帶巡查防守又委候補從九品潘振玉持令同水師所派中營把總楊得器外委沈春暉坐駕漁船督帶兵役赴鹿耳門以南四草湖喜樹仔沿海一帶巡查防守鹿耳門正口雖已淤廢而小船尙可出入且該處淡水所在向爲眾

船汲取恐有偷漏委前署蘭廳閩令爲總巡持令會同水師所派左營千總梁鴻寶督帶兵役專駐鹿耳門防守策應南北兩路分頭巡緝職道督同臺防廳臺灣縣傳集郊商船總面諭毋許小船竹筏出口以斷奸民接濟水米偷運鴉片一面飛飭北路廳縣營一律防堵由才職委署右營遊擊呂大陸持令馳赴安平會同護安平協副將江奕喜相機轟擊該協調護中營遊擊事守備翁秀春署右營都司事守備林得義督帶三營原派在洋防堵夷船之大號哨船及出洋巡緝師船十隻分爲左右翼該護協江奕喜親自坐駕安海船兵船一隻爲中路又雇派漁船二十隻往來接應兼防奸民出海沿海多備旌旂時放鎗礮以壯聲威該夷船在外洋遊奕不敢駛進內洋各師船因風

息全無不能前進十九日早微起東南風該護協江奕喜恐該夷船竄入北路嘉彰一帶洋面甚長殊難措手隨督同各師船自北而南佔其北竄之路奮力前進鎗礮兼施該夷船放礮回拒一面轉蓬向西南大洋而逃各師船追至菱丁仔洋面時已昏黑忽起大霧東南風轉盛浪湧如山不敢冒昧前追至二十日寅刻霧收瞭望夷船已無蹤跡隨各收回查點各船惟守備翁秀春坐船舢邊被夷礮小有擊損餘皆無恙亦未傷人伏查此次夷船之來或因內地嚴逐飄竄來臺或因乏水米或圖銷鴉片來臺採取均乘可定一見兵船攻擊隨即逃竄伎倆有限可知惟夷惟狡猾難保其去而不來或引類而至不止一船均不可不防現通飭各屬整齊船礮實力巡防所有擊走夷船緣

東興文後集 卷之四
三
申謹肅稟報

上鄧制府請造戰船狀 庚子六月

前奉憲函以夷務緊要恐師船未能得力令詢王提軍前
造建威船式當經往詢頃得復書謹以陳聞提軍亦自
有書徑覆鈴轅由鹿港發遞當可速達竊意此時夷務關
重製造大號戰船實爲要著而不得其人徒資糜費且洋
面正在需人似難更行分撥聞憲節即日移駐泉州可否
馳書約王提軍到廈面商或竟奏令到廈督造戰艦必蒙
允也此次大船專爲攻擊夷船而設其製與舊時
成規不同工料皆倍只可暫用一時不能以爲常製且非
道廠文員不諳海洋攻戰者所能承辦查例造集字號船
樑頭二丈六尺長八丈二尺實領例價銀五千八百餘兩

成字號船樑頭二丈四尺長七丈八尺實領例價銀四千
九百七十餘兩大同安梭樑頭一丈九尺長七丈二尺實
領例價銀九百九十餘兩此二項船皆水師攻戰所必需
而實不及夷船高大欲求必勝自當更造巨艦如王提軍
昔時建威奠海等船而後可建威奠海二船樑頭皆二丈
九尺長十丈六尺有奇大桅皆用番木其長十丈以上此
等巨料皆道廠所無松杉等木猶可購自上游諸府番木
大桅則惟廈門有之此等番木大桅皆價值數千今商船
稀少此物較賤若得千數百金或二千金似亦可購誠能
奏請在廈專造數隻準集字號工價倍給專工製造當可
有成也至臺灣水師惟有同安梭及白底船二項更無出
大同安梭以上者緣海外往內地購料轉運維艱往返稽

東海文徵集 卷之四
時累月經年必致悞事是以向來並集成字號之船亦未
建設第恐夷船竄入誠非大同安棧所能取勝擬求憲台
於製造大號戰艦之時並飭督工之人在廈添造如集成
字號者各二隻交安平澎湖水師二協分領駕回配用查
福廠前開來摺內承造集字號一船例價外賄用工料銀
一千八百餘兩臺廠向無造過此號大船此次若由內地
製造所有例價不敷之銀應由臺灣道府廳縣公捐津貼
由司先發在臺餉內扣撥在臺捐還以濟要工而重軍需
瑩爲夷務緊要起見是否有當除備公牘外先此馳聞
上督撫言防夷急務狀 庚子七月二十日鎮府會銜
本年六月初一日職道等會同查明臺灣各口水勢及水
師船礮情形具稟憲鑒在案茲於七月十三日行商傳抄

逆夷竟敢駛至浙江徑攻定海縣城失守不勝髮指查逆
夷奸謀已久因粵東閩省防禦甚嚴出我不意越犯浙東
以定海兵力稍單猝致失事現在大兵雲集指日自可殄
平惟閩粵爲逆夷往來之路且有夾板船於本年六月十
五十九等日在澎湖及臺郡外洋窺伺雖均經當時擊走
而防備更不可不嚴現聞憲臺親駐泉州調度一切廈門
有水師提督重兵駐守復有金門漳州兩鎮水陸聲援可
期磐石之安獨臺灣一府孤懸海外民情本已浮動自前
年懲創後去歲至今甫得安謐而元氣久虧正在加意撫
循詎聞定海警報未免人心疑懼况年來查辦煙案甚嚴
沿海奸民不免嗟怨一旦有警恐其乘隙滋事是臺灣所
患不惟外禦逆夷尤須內防奸宄也臺協水師副將雖轄

有三營弁兵二千二百七十名然其右營洋汛則在鳳山左營洋汛則在嘉彰隨駐安平防守郡城者實止中營游擊弁兵七百七十三名而已南路港小水淺尚非夷人之所垂涎北路綿長水師左營游擊駐札鹿港距鹿耳門洋面三百餘里中有五條港卽樹苓湖口門較寬無險可守最爲緊要艦舳參將所轄滬尾水師一營弁兵僅七百名其洋面上自噶瑪蘭下至淡水之大甲七百餘里口門數處惟雞籠滬尾較大而雞籠尤爲寬深實通臺最要之處距郡遼遠殊苦鞭長莫及至於澎湖四面大洋爲臺廈中流鎖鑰水師副將所轄兩營弁兵一千八百三十八名文員只通判一人雖民風尙淳不若臺灣之浮動而形勢孤單實爲可慮三路水師情形如此現在整飭師船礮械僅

可防禦一二夷船儻遇大幫卽形單弱本職訓練精兵未敢稍懈惟臺灣每屆秋冬尙須出巡南北兩路浮動之民尤須鎮壓未便舍根本而事外洋臺澎水師又各有洋汛自行防守更無堪以調撥之舟師此職道等所日夕籌思不無踧踖者也茲督同卑府一本再四熟商惟宜嚴守口岸斷絕接濟察夷船之多寡相機出擊儻夷船連艘而至尙須內地舟師迅速接應是爲要策謹將現辦急要事宜七條爲憲臺陳之一曰募壯勇以貼兵防防夷要口一爲安平大港二爲樹苓湖三爲五汲港四爲滬尾卽八里坌五爲雞籠水師汛兵不敷巡守自當酌調陸營弁兵貼防惟腹內地方緊要姦民伺隙卽起未便多撥致令空虛尙宜兼用民壯以資防守蓋臺地向來有事無不借義民助

力者不惟以壯官兵聲勢且假此收用游民免爲賊用也
今擬每口酌雇壯勇二百名派委文武督同總理頭人管
帶駐扎海口以資防禦委員薪水壯勇口糧由地方官同
管口之員捐給一半由職道於公項內津貼一半自九月
後西北風起預備至年底止察探逆夷情形再行減撤其
陸營弁兵則俟臨時調撥以免自老其師二日派兵勇以
衛礮墩臺地正口雖有礮臺而小口如東港樹荅湖五汊
港雞籠或因地形偏僻或因沙埔平遠無險可據礮臺並
未建設近奉憲臺會同 欽使奏建礮墩誠爲簡便但
既設礮墩必有礮牆以藏兵勇今悉用竹篾麻袋貯沙爲
之每一礮墩牆寬二十丈用兵勇百人架大礮二門小礮
三門以十人放礮二十人執烏鎗以衛礮三十人執長鎗

以衛烏鎗二十人持藤牌短力以衛長鎗每一口岸相度
地形酌用礮墩三座或兩座互爲犄角三日練水勇以鑿
夷船募海邊壯丁善泅水者水師每營百名使之學習水
底行走用大鐵鑽鑿逆夷船底或彼有倒鈎則不可鑿從
其艙後扒上夷船殺其夷人砍其艙舵此項水勇必須召
募除臺灣額准召募名數外其內地各營換班額內現有
班滿事故未經換到補額者不下數百十名應請準于召
募水勇中挑其尤爲精壯者賞給補充咨明內地暫免換
補俟事平後再復舊規以符定制四日習火器以焚賊艘
海洋舟師遠者用礮近則利用火罐噴筒以焚敵舟非練
用精熟不可本職現令水師如法製造教習各兵務使嫻
熟惟火藥現僅領到十七年分尙欠十八十九二十等年

未到伏乞飭行藩司全數發交臺營請領員弁迅速解回應用俟到日補具印領申送五日造大艦以備攻戰臺灣向無大號戰船緣臺廠軍料購自內地大料不能配運哨船至大號同安梭而止僅備攻擊夷船必須添造大艦如集成字號者二隻或四隻分給臺澎兩營配用嘉慶年間攻剿蔡朱二逆曾奏明特造太艦今逆夷猖獗似宜請動帑項專派大員在廈製造多隻爲臺廈水師之用或例價不敷由臺內文武分年攤捐實乃攻夷要務但須選訪善於製造之人親自督工非尋常廠員所能曉辦六曰雇快船以通文報逆夷去來無定洋面倏息千里偵探消息必須內外相通不容遲悞應飭澎湖臺防鹿港淡水有口四廳各雇快小漁船二隻往來臺廈蚶江澎湖偵探逆夷動

靜一有警信立即飛報並請憲臺飭令廈防蚶江二廳一體雇備馳報臺澎七口添委員以資防守地方有事各口及地方該管官皆有責成惟臺地如嘉彰二縣民情浮動事務殷繁淡水一廳又以地方而兼口務澎湖則文員止通判一人誠恐顧此失彼必須添委幹員協全防禦現有王庚徐柱邦二丞范學恆裕祿魏瀛三令俱經卸事尙未內渡擬委王庚往淡水協全該丞劉繼祖辦理范學恆往嘉義協同署令魏彥儀辦理徐柱邦雖係丁憂人員但新任孫署倅甫經到任徐柱邦正在澎湖交代且防夷軍務可以援例奏畱應請卽畱在澎湖協全署倅孫化南辦理此三員皆曾任其地之員情形熟悉再於佐雜內挑選明幹者隨之會同該地文武團練鄉勇查禁奸民接濟似爲

得力裕魏二令及素有膽略熟悉軍務之參員託克通阿暫留郡城聽候差遣以上七條皆目前必不可緩之事惟是事關重大處處皆需經費籌備爲先道庫雖有備貯之款未敢遽行動撥而在臺文武廉俸無多向爲每年額捐及歷次軍需攤捐又操練精兵船廠賠費各款已數萬金尙有隨時派捐不在此數是以辦公素形竭蹶此次防夷需用甚多不得不仰乞憲恩籌撥無礙閒款通融津貼查有噶瑪蘭歷年征存下則田園供耗未報升科之款洋銀一萬元解存道庫道光十八年七月間經職道報明前憲批准提出九千元分貯鳳山嘉義彰化以備不虞是年南路張貢北終賴三等匪徒滋事各縣賴有此款先行拏辦中路胡布游益生逆匪之起黨羽無多得以迅速撲滅及後奏請帑項或銷或攤已歸還封貯昨准前任吳藩司來文又將此款詳請改發府庫抵扣明年大餉在吳藩司以爲肅地未報下則田園現辦升科所有歷年征存必須報部候撥固爲慎重錢糧起見但事有輕重時有緩急不可無所權衡臺灣海外巖疆軍旅數興府廳縣庫早已奏明匱竭地方浮動不定何時用兵當事之初起全賴辦理應手庶星星之火不使燎原而無費不行徒手必然坐悞今防夷事大所費甚鉅若責令在臺文武盡出捐資實有萬難措備者况此款並未報部實不同於正項即使升科案定亦可據實奏明惟有仰祈憲台俯鑒海外孤懸防夷緊要飭行藩司准予蘭廳征存未報部款內由職道酌量動撥爲防夷之用事後核實報銷免抵明年大餉如此則地

東海文後集 卷之四
方辦公有資各屬賠累稍輕舉事庶能應手儻爲日持久
再容另籌抑更有請者海外文報往返稽遲以上各條若
俟奉到憲批恐不及事職道等彼此熟商意見相同不得
不在地先行舉辦合並呈明

覆鄧制府籌勘防夷狀 庚子九月

八月十三十四等日奉六月二十一暨七月十二兩次鈞
函祇悉逆夷犯順舟山失守憲臺現奉 諭旨駐札泉
州籌辦攻剿防堵事宜深蒙厪念臺灣開示要略頒發餉
銀又奉檄文十數件示以夷蹤詭秘教以備禦之方瑩時
在鹿港彰化一帶勘辦北路各口防禦事宜捧誦之下欽
佩實深當卽緘封憲函馳寄達鎮一全閱看飭行所屬文
武遵照伏思疆爾醜夷因 天朝絕彼貿易無計資生

竟敢肆其猖獗擾我邊陲定海猝未及防致爲越佔指日
天戈雲集不難迅奏蕩平而臺廈澎湖素爲彼所垂涎之
地勢必分趨騷擾丙地水提在假陸提又赴援浙江憲臺
總統文武獨抒經略瑩身受海外重寄惴慄倍形民情浮
動之區攘外先須靖內逆夷船高礮大勢難取勝外洋我
兵攻具未齊目下要務自當保固藩籬守定而後議戰前
經查明水師船礮並籌議事宜同經費要款先後會稟計
日內當邀垂覽至防守要地則郡城全臺根本鹿耳門雖
已淤淺商船不入而安平大港外之四草洋及鹿耳門北
去二十里之國賽港均爲邇來商船停泊之所大港迤南
之三鯤身亦可小船出入皆郡城門戶全賴安平一協西
障四草北阻國賽港南控三鯤身實乃第一扼要經會督

護水師副將江奕喜臺灣府知府熊一本臺防同知全卜
年及該營縣派雇戰哨民船多配弁兵水勇千二百名羅
布港門復於紅毛城原設礮臺一座新設大港內外礮臺
四座之中橫築礮墩綿亙百餘丈守以兵勇五百餘名達
鎮復於岸上深挖濠溝密布釘板多插旗幟派委前臺灣
縣託令督率鄉勇每日三次登陴嚴申號令其四草鹿耳
門國賽港三鯤身亦多築礮墩百十餘丈至二十餘丈不
等各守以兵勇屯丁或一百名或二百名所有大小礮位
及新製火器會同親試演放均能如法是郡城防守尚爲
謹嚴至北路各口經營於八月初七日啟行遍歷嘉義之
樹苓湖纏仔蔡彰化之番仔挖卽鹿港正口王功港卽鹿
港之內口五汊港在淡彰交界及淡水南境之大安中港

香山竹塹四口北境之滬尾卽八里坌口以至極北之大
雞籠要口月十七處皆當設防而尤以樹苓湖躔仔蔡番
仔挖滬尾雞籠五處爲最要均會督營將廳縣設立礮墩
派雇戰船民船分配弁兵壯勇或巡守於港門或駐守於
岸上多插旗幟兵勇每日三次登陴施放號礮務使聲威
嚴壯其各小口亦酌仿而行每勘一處皆相度地勢酌定
章程或八條或十數條咨商達鎮九月初十日勘竣仍沿
海覆查約本月下旬可以回部再將辦理章程逐一開具
清摺繪圖貼說另呈憲鑒惟澎湖一島孤懸鞭長莫及詹
副將同該廳在彼堵禦亦尙謹嚴現因徐署倅告病已經
藩司委雲霄同知王庚前往接署瑩飭令臺灣府籌備銀
款發給以補司扣餉銀當不悞事緣奉諭函謹以現辦情

形先行呈復

臺灣十七口設防圖說狀

庚子九月鎮道會稟

憲檄飭知浙省逆夷猖獗廈門接仗情形奉 上諭臺灣府準備事宜在籍前任浙江提督王得祿最爲熟悉或有應行商酌之處著卽飛飭該鎮道與王得祿同心協力以資保衛欽此卽已轉咨王提督欽遵惟時本職在郡城督同護水師副將江奕喜臺灣府知府熊一本及該廳營縣防堵安平上下要口職道在北路親歷各海口直至大雞籠督同各營廳縣逐一勘辦并飭噶瑪蘭廳營將界外之蘇灣妥爲預備事竣回郡本職隨往南路巡閱督同該營縣一體妥辦伏思臺地民情素本浮動平時尙多不靖茲值逆夷滋擾宵小不免生心攘外必先靖內所有廳縣

官及陸路弁兵皆當照常彈壓地方不可輕動其防夷海口惟宜專用水師及陸路本汛弁兵第道里綿長各路設防最要次要海口凡十七處水師不敷分撥自宜多雇鄉勇旣得防夷之用亦藉此收養游手消不靖之心統計郡城最要二口次要三口用水師兵一千五百三十七名屯丁一百名雇募鄉勇一千六百六十名水勇一百名嘉義縣要口二處用水師兵二百四十名雇募鄉勇四百四十名水勇一百二十名彰化縣要口一處次要二處用水師兵三百五十九名陸路兵一百名鄉勇五百五十名水勇一百名淡水廳要口二處次要四處用水師兵六百四十一名陸路兵四百九十名鄉勇四百名水勇二百名屯丁一百名噶瑪蘭廳界外一處用陸路本汛兵一百五十名南

路鳳山一縣次要二處用水師兵一百五十名陸路本汛兵一百名鄉勇三百名共用防夷弁兵屯丁三千九百六十六名鄉勇三千三百五十名水勇五百二十名或配商船戰船堵防內港或在礮臺礮墩日夕登陴此皆長川在地之師其王提督及廳縣自行練備鄉勇來往巡查策應者或二百名或三百名不在此數復會各莊紳董頭人團練壯丁一二百名至七八百人不等通計四縣二廳各莊內團練壯勇具冊者已一萬三千餘人以備一旦有警半以守莊半出聽候調用本職統率自練精兵六百名及陸路各營將士蓄養精銳以待臨時策應至所築礮墩仿照憲臺奏明蔴袋貯沙之法更以竹篾貯沙爲之稍爲耐久其上仍用蔴袋爲垛口高一丈厚一丈長自十丈至三五十丈不等至竹城一法則臺地村莊本皆栽竹爲垣無用更辦惟於礮墩外加樹大麤竹筒長一丈五尺埋地五尺其上一丈竹節打通中灌以水編連排插重重以爲外護夷礮雖猛穿沙較難見水亦可減力矣更令多備牛皮網紗棉被隨時以避鎗礮又於礮臺礮墩要隘挖寬一丈二尺深一丈濠溝百數十丈製備釘筒竹板鈎鑷鎗棍六千四百餘件鐵蒺藜十萬三千餘箇竹籤十三萬二千餘枝以備夷人登岸之用火器各項除大小銚噴礮劈山礮抬礮抬鎗足用外復多製火箭火罐教令兵丁操演嫻熟彼此熟商辦理務期妥密全臺地旣廣闊復不能定以時日所有鄉勇口糧及備製一切器具需費甚鉅前請以蘭廳未報陞科谷價動用爲數無多尙有日夜在口防守眾兵

東瀛文後集 卷之四
乞准照出洋之例每名日給鹽菜銀三分俾知感奮出力
以上諸費道府籌款暫行墊應統俟事竣分別詳辦所有
會同籌辦各口情形謹繪圖開摺呈鑒

府城

安平大港口 臺灣府西城外卽係內海外有南北沙汕
二道橫亙百餘里攔截大洋爲郡城外護安平卽南汕之
首也與府城相望居民約千餘家駐水師副將一員中營
遊擊額設弁兵七百七十三名戰船十九隻右營都司額
設弁兵七百七十三名戰船十六隻防守府城及南路鳳
山諸口洋面此汕迤南連接七鯤身至鳳山之打鼓港而
止安平舊有紅毛城已傾圮其下正臨大港水深不過一
丈港外稍西卽四草商貨入口仍易小船南北兩路六七

百石貨船亦由大港出入卽北去二十里之郭賽港近雖
可泊商艘若至郡城亦必易小船由安平內港而行故安
平一協東障府城西扼四草北阻郭賽南控七鯤身實爲
最要重地今派中營把總陳國安配濟字二號白底艍弁
兵四十名中營把總陳國安配濟字三號白底艍弁兵四
十名中營外委沈春暉配濟字一號白底艍弁兵四十名
中營外委呂元生配平字八號大同安梭弁兵四十名署
左營千總陳國庸配澄字五號大同安梭弁兵四十名右
營外委王子金配澄字二號大同安梭弁兵四十名右營
外委甘殿邦配順字十一號大白底艍弁兵四十名署右
營把總溫克璇配澄字六號小同安梭弁兵三十名右營
外委葉晞陽配濟字十一號小白底艍弁兵三十名右營

外委孫志明配濟字十號小白底船弁兵三十名以上戰船十隻弁兵三百八十名礮械軍火全防守大港署右營守備王國忠駕安海船帶領三營目兵五十六名往來大港內外稽查策應

紅毛城礮臺一座設一千斤礮三位五百斤礮一位中營把總陳聯青帶一効用目兵三十一名守之大港礮臺三十座設二千斤礮四位一千五百斤礮十位一千斤礮五位八百斤礮三位六百斤礮三位五百斤礮四位中營千總陳連標帶一効用目兵一百六十二名守之天后宮礮臺一座設一千五百斤礮一位五百斤礮四位四百斤礮一位中營効用黃經祥帶目兵三十一名守之安海頭礮臺一座設一千斤礮一位五百斤礮三位右營効用蘇輝

帶目兵三十一名守之灰窰尾礮臺一座礮墩三十四座設二千四百斤礮一位二千斤礮六位一千五百斤礮十位一千斤礮十六位八百斤礮二位五百斤礮二位右營把總蘇文彬帶目兵一百四十八名守之前任臺灣縣知縣託克通阿帶鄉勇三百二十名分四隊護守兩處礮墩其墩外各挖深濠長一百丈寬一丈二尺深一丈釘桶釘板鈎連槍棍三千八十餘件鐵蒺藜八萬三千餘件竹籬九萬二千餘枝臨時應用

四草海口四草與安平斜隔大港卽北汕之首也其外水勢寬深臺灣大商船自內地來皆停泊於此俗名四草湖遙望安平約十里築礮墩十座連長三十丈設一千五百斤礮二位一千斤礮三位八百斤礮二位墩外挖濠溝

寬一丈二尺深一丈長四十丈濠溝內布竹籤二萬枝外備釘桶八百箇釘板八百塊鐵蒺藜二萬枚臨時應用派外委楊金標帶目兵八十九名文員興隆巡檢李清滙帶鄉勇二百名守之

鹿耳門 鹿耳門距四草不及五里在昔號稱天險自道光二年淤塞今口已廢水深不過數尺小船亦難出入姑築礮墩五座設礮四位派外委一員帶兵五十名守之又募鄉勇五十名交文員李清滙兼管防守巡查仍備破船木植設有警卽行堵塞

郭寮港 在鹿耳門北十里爲臺嘉二縣交界之所本卽北汕爲水衝成港口門頗深近年大商艘多收泊於此水底沈汕蜿蜒非熟習水道者不能輕入港內有新長沙埔一片文武汛館在此稽查商船四面背水兵勇不能駐守然商船亦不能進至安平派外委二員帶戰船二隻弁兵八十名文員一人帶鄉勇二百人防守口內其東北岸上令在地頭人練義勇千人在地防禦仍多備破船木植大石有警卽填塞港道

二鯤身 在安平迤南三里本卽南汕與三鯤身毗連近年水衝成港水淺小舟可以登岸今築礮臺五座設一千五百斤礮一位一千斤礮一位八百斤礮二位派外委李相齡帶兵五十名屯外委一員帶屯丁二百名守之護臺水師副將江奕喜駕戰船一隻督中營遊擊蘇斐然右營都司林得義各駕戰船一隻快船二隻率領弁兵一百五十名新練水勇二百名調度策應

臺灣鎮總兵達洪阿統自練精兵六百名督城守營副將
中左右三營遊擊率領本營弁兵居中彈壓府城調度策
應

臺灣道姚瑩督同臺灣府知府熊一本籌畫全臺戡守事
宜備用各路糧餉度支一切經費臺防同知全卜年臺灣
縣知縣閻所來往巡查建製礮墩旗幟號衣器械戡守戢
具雇備鄉勇民壯帶領總理頭人團練義勇二千五百名
聽候調用

鳳山縣打鼓港東港 打鼓港在埤頭縣治西南十里打
鼓旗尾二山之間口門淺窄外有沙坪大船不入旗尾山
上建有礮臺一座本水師汛今設大礮八位外委一員帶
兵五十名縣備鄉勇二百名共守之東港在埤頭縣治東

南六十里鳳鼻山後外有沙汕對面海中有小琉球嶼船
自北來須由打鼓港外洋避汕而行繞琉球嶼方能入港
口門稍闊水深不過一丈惟數百石小船可入今設礮墩
八座大礮八位地兼水路二汛今派水師千總一員帶弁
兵一百名又陸路把總一員帶弁兵一百名縣備鄉勇二
百名共守之

南路營參將余躍龍率陸營弁兵一千一十九名山豬毛
都司祥祿率陸營兵五百八十九名鳳山縣曹謹率自練
精勇二百名各莊團練鄉勇三千名隨時策應

嘉義縣樹苓湖 嘉義縣西北六十里海口有樹苓湖又
名象鼻湖北距五條港二十八里南距笨港之猴樹港十
五里外有沙汕二道若斷若續內圍為湖上下三十餘里

東溪文後集 卷之四
俗以五條港爲上湖樹苓湖爲下湖湖內水深自一丈七八尺至四五尺不等自岸至口門約逾十里湖大時一望汪洋潮退時海灘至岸約五六里上湖口門久淤惟下湖可進大商艘海岸寬闊居民無多口門復遠礮力難到亦無險可據守然不可以空虛恐姦民引賊以小船入港此湖稍南五里有地名躍仔寮正對口門可以扼守今設大同安梭大白底船各一隻派臺協左營守備翁秀春統外委陳朝綱曾振威弁兵一百名泊守於樹苓湖口內其岸上築礮墩八座設一千五百斤礮二位一千斤礮二位八百斤礮一位五百斤礮二位使把總李瑞麟帶弁兵六十五名斗六門縣丞姚鍾瑞帶鄉勇二百名守之其纏仔寮設礮墩八座二千斤礮二位一千斤礮八位使把總龔正

勳帶弁兵七十五名笨港縣丞白鶴慶帶鄉勇二百四十名會同防守又設快船八隻水勇一百二十名交龔正勳管帶在口門內外巡查姦細

嘉義營參將洪志高督率本營弁兵七百名在城彈壓臨時策應嘉義縣知縣魏彥儀建製礮墩寮房器械旗幟號衣一切攻守器具隨帶鄉勇三百名來往巡查

在籍前任浙江提督王得祿會鎮道籌辦事宜自募鄉勇三百名督率各民壯團練義勇三千人隨時策應

彰化縣番仔挖 在彰化縣西南五十里南距樹苓湖六十餘里北至王功港七里又北至鹿港理番廳治二十三里昔時鹿港口門最大嘉慶中鹿港口門淤廢商船由王功港出入海寇不靖建礮臺港內道光以來王功港口又

於商船皆從番仔挖出入矣番仔挖口闊水深外有沙汕一道迤邐自南而北商船自此入口由港內經王功港而至鹿港故以番仔挖爲鹿港外口自東岸西至口門沙汕遠約十里至深水行大船處約三里岸上居民舖戶頗盛地勢平闊岸上設礮墩五座一千五百斤礮二位一千斤礮一位八百斤礮一位五百斤礮一位派水師効用林飄香帶兵六十名守之臺協左營遊擊劉光彩督把總蔡萬順額外李才生駕戰船四隻快船四隻配弁兵二百二十名水勇二百名停泊港內防守鹿港同知張汝敦督同外委一員陳進陞帶鄉勇二百名在岸駐扎會同防守

王功港 又名牽船湖爲鹿港內門舊礮臺一座上年地震損壞知縣黃開基修葺完固又於礮臺下築礮墩五座此處係內港無用哨船守港今于礮臺設一千斤礮五位以効用林奇貴帶兵五十名義首林耀南帶鄉勇一百五十名守之

五汊港 卽鼇栖港在彰化縣北界南距鹿港四十里北距大甲溪三十里口門水深一丈或七八尺其南有水裏港口門水深一丈四五尺二口相距甚近不過數里商船二三千石至者水小由五汊港入水大由水裏港入二口皆當防守五汊港設礮墩五座一千五百斤礮一位一千斤礮二位八百斤礮一位以水師額外許熊飛帶目兵五十名北協外委一員帶目兵一百名貓霧揀巡檢高春如帶鄉勇一百名共守之水裏港設礮墩五座義首七品小京官王雲鼎童生王錫齡捐資帶鄉勇鳥鎗手一百名防

守

護北路副將關桂中營都司蕭廷鵬督本營弁兵一千一百名在城彈壓往來策應彰化縣知縣黃開基建築礮墩製備器械旗幟號衣自雇鄉勇三百名巡查策應督率各莊團練義勇三千名聽候調撥

淡水廳轄地勢綿長次要小口四曰大安曰中港曰香山曰竹塹最要大口曰滬尾曰大雞籠

大安港 在廳治西南九十里大甲溪之北昔年水口寬深內地大商船可到近淺窄惟數百石小船出入舊有礮臺一座臺左側矮牆十餘丈署同知范學恆甫修整完固乃北路協右營汛地大安之東十里即大甲街駐守備一員千總一員兵丁二百名行以策應今于大安礮臺設一

應

滬尾 即八里坌口在淡廳北二百里府志所云淡水港是也兩岸南北相對皆山中開大港寬七八里口門水深一丈七八尺港內深一丈二三尺或八九尺滬尾在北岸八里坌在南岸港西爲海口昔時港南水深商船依八里坌出入停泊近時淤淺口內近山有沙一線商船不便皆依北岸之滬尾出入停泊口內北岸六七里許有已廢紅毛樓尙存背樓臨水舊建大礮臺一座頗雄壯臺基可容千人水師守備一員本汛兵五百八十名駐此循北岸東行二里許民居街約二三百家即滬尾街也由此東行水程三十里即至艋舺爲淡水最大村鎮巨商富戶皆萃于此艋舺參將兼轄水師營署在焉今礮臺設二千五十斤

東溪文後集 卷之四
礮二位一千五十斤礮一位一千斤礮八位八百五十斤
礮三位八百斤礮七位六百斤礮一位本汛把總楊得喜
帶兵三百名專守礮臺守備陳大坤把總李朝安外委林
雙喜額外一員管駕戰船四號僱商船二隻弁兵二百二
十名水勇一百名在港防守

大雞籠 在淡水極北轉東之境距淡防廳二百五十五
里由艦舫入山北行三十里爲水返脚轉東行二十五里
至大雞籠萬山叢峻下多深潭急溪民居番社錯雜其間
至大雞籠極高俯瞰全臺在目嶺下三面峯巒環列中開
大灣東北一面向海口門極其寬深灣長七八里外寬五
六里內寬里許灣內深水二丈有餘可泊大商艘數百號
岸土居民舖戶七百餘家民居後一望平田約將千畝惟

三面叢山峻嶺土產無出故無大行商不能設口昔紅毛
於此建城久毀嗣於東口門之大沙灣設礮臺孤懸難守
海寇之亂礮數搶失遂廢至今未建而口門寬深夷必窺
伺今相度形勢於境內正對口門之二沙灣築礮墩八座
設二千斤礮二位一千五百斤礮二位一千斤礮四位五
百斤礮二位調頭圍守備許長明帶兵八十名督同雞籠
本汛把總弁兵一百五十名守之更于向內二里許之三
沙灣築礮墩八座以舸舫縣丞宓惟慷帶鄉勇五十名調
屯外委一員帶屯丁一百名守之以爲應援滬尾水師千
總葉國棟外委林光華額外一員駕戰船四隻僱用商船
二隻配弁兵二百二十名水勇一百名在灣內泊守使夷
人登岸則山峻水深可以扼險憑高擊之不足慮矣

東漢文後集卷之四
三十一
艚船營參將邱鎮功督陸營弁兵每月至雞籠滬尾二口
巡防二次隨時調度策應署淡水同知范學恆帶鄉勇二
百名往來各口稽查督勸各莊義首總理團練義勇一千
人聽候調撥

噶瑪蘭廳蘇灣 噶瑪蘭境內雖有烏石加禮遠二港口
皆極淺窄春夏以後惟三五百石小船出入秋後即小船
亦難入口應無庸議惟蘭廳南境逾馬賽山界外有蘇灣
一處水勢寬深灣內可容大艘數百號昔蔡朱二寇曾泊
船于此欲以登岸其灣三面皆山東南係生番界地勢險
峻本設有把總一員弁兵五十名今調溪洲把總帶兵一
百名往灣協防築礮墩八座設大礮八位蘭營都司駐札
蘭城距灣五十里有警可以立往策應更令總理頭人督
率各莊團練鄉勇一千人聽候調用

東漢文後集卷之四終

東漢文後集卷之四

東漢文後集卷之五

桐城姚瑩展和甫

防夷急務第二狀

鎮府會銜辛丑正月二十日

本年正月初六日准水師提督咨奉道光二十年十二月初二日
 上諭以英夷包藏禍心無厭之求益無底止如有不得不攻剿之勢則兵貴神速不可稍有遲延坐失機宜務當體察嚴密防範其平日得力之將弁及應用之鎗礮火藥等件均當預為籌備前調各兵雖已有撤回歸伍者而本地防兵為數不少尤當分布要隘有備無患等因欽此又咨抄憲臺十二月初七日奏英夷復肆築鰲閩省各海口現在練兵調勇嚴密防守情形一摺當經咨會王提督並飛飭各屬一體遵行職道等會查臺灣防堵事

東洋文後集 卷之五
宜已於上年九月內詳繪圖說稟陳在案嗣奉憲文遵裁
撤杜勇漁船之旨職道於十一月二十日後酌量次第減
撤以節糜費本職仍督飭弁兵嚴行防守今英夷既仍有
桀驁情形自當如前派設壯勇以助軍威而昭嚴密伏思
臺灣孤懸海外南北二廳四縣綿亘一千四百餘里名爲
一郡實兼內地福興漳泉四府道里之長內地水陸二提
六鎮四協以全省兵力防守尙形喫重臺灣一鎮雖云水
陸官兵一萬四千除澎湖協兵隔海外在臺水師僅安平
一協及艋舺參將所轄不及三千人分守十七要口實形
單薄陸路弁兵分布郡城內外及諸廳縣存城分防一百
四十二汛僅敷彈壓而民情浮動姦宄時萌近又查擊鴉
片嚴緊愚民惡習一時未能滿洗匪類常思與官爲難定

海失守夷船遊奕臺澎深恐在地奸民乘機竊發內靖外
攘十倍內地之難欲計安全非徒手所能爲力儻不先期
預備一旦遇警則重洋閒阻內地縱有熊羆之師百萬之
餉不能飛渡此職道等日夕思維不無深慮者也再四孰
商現有急要四事不得不仰陳於仁憲者一曰海外經費
不可不裕臺灣昔時地方殷實紳商頗多每逢警變莫不
捐輸効力府庫亦常存銀二三十萬可先支應以待內援
然前人猶時以東顧爲憂自蔡逆騷擾海上商力大虧生
業消敗三十餘年矣繼以嘉慶十五年道光六年兩次分
類械鬥十二年張丙十六年沈知十八年胡布屢次作亂
元氣蕩然紳民縱肯急公多苦捐資無出而府庫備貲自
嘉慶年間已爲軍需用盡卽道光十三年奏發道庫備貲

東海軍餉集 卷之五
十萬亦爲沈胡二案動支僅存五萬五千餘兩爲數無多殊不足恃上年籌備防夷並未領帑所用經費三萬四千餘兩酌勸蘭廳未入額征存穀價外府廳縣尙押墊二萬有奇職道現請飭司發還今年防禦事宜實屬無可支應目上年夷人圍銷禁物猶可守而不戰設今再至必當相機攻擊情事不同現據各廳縣紛紛稟請籌發經費每處萬數千金或至二萬爲數甚鉅其勢不能不給伏思前蒙預發本年大餉六萬所以爲海外計者實深且遠上年防夷卑府卽於此項挪用一萬餘兩本年經費若待請領來臺緩不及事不得不仍先挪用而大餉本隸亦屬緊要防夷久暫未可預期斷非寬爲籌備不可應請憲臺飭司於本年大餉之外撥銀十萬兩半給足重番銀來臺作爲防夷經費更採前任吳藩司道光十八年之議奏明再撥捐監銀十萬兩亦半給足重番銀解臺存貯道庫以備地方不虞庶巖置有恃無恐二曰大餉扣抵不可過多臺灣年支兵餉二十二萬餘兩除在地錢糧雜款抵支外嘉慶年間省發常十五六萬或十七八萬嗣後司中扣抵款項漸多然尙在十萬以上惟上年大餉止發六萬餘兩卽澎湖需發銀三萬餘兩亦因抵扣僅發二萬兩藩司稽核度支原皆應扣應抵無如各款內或因豁免奉刪或係軍需挪墊或以捐攤未足或因交代奉追亦有本係應領因款冊奉駁未給又民間希冀豁免錢糧徒事追呼仍多延欠若非稍事通融則紙上空數之銀不濟實用恐海外兵餉缺乏貽悞匪輕至澎湖窮島孤懸情形更亟應請飭司於臺

澎二餉應扣應抵之中察其事尙有因者准免扣抵司中少扣一分之餉則海外可減一分之憂遇事卽多一分之用三日派委大員協守澎湖查澎湖西距廈門水程七更東距臺灣水程六更西面大洋與臺灣同一孤懸幸地小民貧風氣淳樸尙無反側之患額設通判一員水師副將一協兩營弁兵一千八百餘名原足以資鎮守惟臺廈兩處現均戒嚴萬一夷寇猖獗倉卒難以救援澎湖需費需人必當籌計上年蒙前憲奏委副將葉長春帶經費番銀三千往同守樂職道亦籌番銀一千同卑府籌給銀番委丁憂之前署通判徐柱邦及司委署廳之雲霄同知王庚往澎會辦嗣因內地撤防葉副將給咨北上內地未再委員前往臺營所在皆關緊要將備弁兵實無可以調撥者

應請仍於內地各營遴選明幹大員同詹副將及該通判等協防要地並請籌給經費一二萬兩隨同大餉發交該廳存貯撥節動支俾無貽悞四日新鑄大礮分給臺澎以備要口上年省中鑄造八千斤及六千斤大礮原爲防夷之用此時當已告成臺澎大礮無過三千斤者應請將新鑄大礮酌給八千斤者二門六千斤者六門撥給臺灣郡城之安平八千斤二門六千斤二門淡水之大雞籠及滬尾各給六千斤一門澎湖之媽宮口給予六千斤二門庶爲得力以上四事均屬目前急務職道等督同卑府熟商意見相同王提軍亦以爲然伏祈憲臺俯念海外地勢孤懸夷情叵測悉准飭司迅速核議施行

駁臺灣令壯勇不能登陸議

聞來稟及清摺已悉此次雇募壯勇防守礮墩並令多插旗幟者爲夷匪來往臺澎無非窺探虛實以定來攻與否彼見我口內無人則將乘虛入矣夫用兵之道我強則示之以弱我弱則示之以強如果水師兵足船多或尙可恃無如水師單弱不得不募壯勇以資防禦且多插旗幟海口使不測我兵多寡但見岸防嚴密不敢侵犯豈非不戰而退敵之策乎况臺地惡習游手之徒每際秋冬輒思蠢動今借防夷收集使沿海窮民得以資生免爲敵用是攘外卽所以靖內也惟通臺要口甚多每處募一二百人卽已爲費不貲月日方長何能多募且使夷匪大幫若至尙須調集陸營兵丁更多募壯勇數千人乃可決勝又豈數百水師兵一二百壯勇卽能濟事耶現在守口登陴者只

用此數及乎臨時戰勝則當更有籌備此本司道所以另有通飭各廳縣並諭各保村莊團練壯勇以備臨時調撥也夷船游奕不定何時皆可窺探而我守口之人終日逸居恐其滋事且烏合之眾初無紀律故爲每日三次登陴之法使其練習隊伍號令整齊不亂一備敵人來窺一使漸知紀律今該員等僅每日點卯一次討海聽其自便有事再行齊集大失本司道召募守口之意矣臺民向遇有事無不臨時召募數千立至又何必先費此每日五十文耶此皆惑於安平人平時討海每日可得三四百文之言似乎每日百文不敷養活耳如果討海者每日可得數百文之利則沿海皆富人矣此言果的否耶爲此言者或竟自貪安逸不肯每日三次登陴故借口於鄉勇亦未可定

即使果實或惟安平之人然耳本司道現帶壯勇出門分別行日飯食錢二百文住日飯食錢一百二十文別無安家之費昨定章程守口壯勇每日飯食錢一百文每月犒賞二次又六百文核計正符一百二十文之數且每名先給安家錢一千文冬月復賞給綿衣錢不為少矣北路皆然安平未便獨異仰再悉心籌商妥辦總以登陴為要若人不在戍則與無人何異倘以安平人已僱定勢難再改則或姑留備用另僱他處民壯前往亦可國賽港鹿耳門四草二鯤身諸處非安平之比或可免其登陴而不能不使之在口該員等酌之定海張鎮以懷諫不備失守奉

旨革職拏問本司道籌備防夷文檄具在將來設有疏虞該文武不能如約責有攸歸噬臍莫及其三思之至於水師將備此時倘仍狃於故習視防夷為具文本司道亦必據實糾參也勉之懷之

駁鳳山合港口毋庸設礮募勇議

據稟會營勸視該縣海口情形繪圖籌議防禦三事具已閱悉惟云港口與安平北路大小不同祇宜內修戰備毋庸外示兵威此論似是而實未洽所云戰備者不外兵勇船隻礮械之用鳳山地方廣闊時有賊盜匪徒滋擾於內陸營兵力尚須彈壓地方非臨事未可輕動此時用防海口惟舟師耳試思該縣水師屬安平右營額兵僅七百七十三名尚須半留安平以固郡城根本所可分防者三百數十名耳是否足額尚未可知而要口已有東港打鼓港二處則每處僅百數十人以禦尋常土寇尚有難恃而謂

東海不待集 卷之五
可當大敵乎該縣所恃者口小水淺夷船不能入耳彼非
愚人豈不知巨舟不能入港不思更換小舟耶現奉憲檄
以夷匪牽劫商艘配坐夷兵剝取漢人衣服則其改坐小
船假冒漢人爲入港之計智固已出該縣上矣夷人腿直
利水而不利陸如果登岸我兵原足以勝之今不禦敵於
港門之外姑且開港縱之使入或欲誘之登岸以取勝乎
是亦一奇也然所以必能勝敵者竟安在引敵入境似奇
而危非密爲部署不可萬一所謀不遂徒自撤其藩籬不
又蹈定海鎮之覆轍乎善用兵者必先自爲不可勝以乘
敵人之可勝閩人矯悍固非浙比然亦惟濱海無賴之徒
敢死耳其平時飽食錢糧晏安習慣者未必皆敢死也况
我水陸兵丁有限而夷匪之來半以漢奸爲之羽翼其變

服而在夷船者及販煙土懼罪下海而爲盜者將與夷匪
併力爲難於我此誠未可執一而不思所變計矣該縣但
知攻夷於岸爲我之利獨不虞漢奸先驅夷匪尙從其後
乎安平及北路皆有大口爲夷人窺伺故以防大口爲亟
南路則惟打鼓港東港稍大總以設立礮墩礮臺爲要礮位亦
名或二三百名協同汛兵舟師防守礮墩礮臺爲要礮位亦
宜先設既有兵勇防守似可無虞爲嫌兵勇之少也故更
多張旗幟以疑之使不測我之虛實及乎夷匪大幫果至
則更以各保團練在莊之壯勇千人或二千人同蓄養銳
氣在營未調之陸路兵出戰以破之而使登岸者得以休
息並非徒任在戍久勞之士責以破敵所謂不自老其師
者此也豈如該縣所言哉本司道通飭廳縣示諭各莊團

東海志卷之五
練壯勇者正爲此用耳夫恃險輕敵自古兵家大忌該縣豈未之聞乎若以石大山張貢之流視夷匪則誤之甚矣其更會營悉心籌辦好謀而成勿任偏見不復三思是爲切要仍將如何籌辦之法縷悉馳報察核本司道北路回郡後卽親臨南路勘視現在夷船來往窺伺不離臺澎並非一旦猝臨者毋得往返空言遲誤機宜凜之慎之

駁淡水守口兵費不可停給議

昨據淡水曹丞以北路海口防兵不能得力請停給防夷經費專用鄉勇已經本司道嚴批駁飭矣兵者國之爪牙所以宣上威鎮亂民也將弁不才訓練無方但可更易將弁豈可因噎廢食耶專用鄉勇其患更有不可言者曹丞能得民心善練鄉勇但知現在義勇感奮整齊以爲

團練有效又見營兵驕惰虛糜經費時復滋事遂欲罷歸柳竹塹兩營防夷兵殊不思鄉勇非他卽臺地之悍民也能善馭之故爲義勇苟一不善則亂賊矣兵亦猶是也不肖將弁治之而驕惰苟得賢能將弁亦豈不可治之爲勁旅乎冠雖敝不加於履辨等級所以養國威也臺營惡習本司道非不知之卽鎮軍亦非不知也特鎮軍之力但能練在郡四營之兵猶不能徧僅練千人他營則皆不能費不足也卽此千人亦有內外之別內精兵實止六百人耳例領錢糧不足全臺文武捐助練費豐厚倍于他營所以獎拔之者亦優于他營故富而強整水陸萬四千人安得盡如精兵之優厚哉全臺十三營皆鎮軍統轄而厚薄攸殊諸營不能無怨鎮軍無如何也諸將中賢者猶不失其

東海文苑集 卷之五
律不肖者則藉爲口實坐使廢弛有由來矣吾思有以結
眾營兵心正賴防夷經費優給之于常得錢糧有加彼亦
人情也恩惠既及乃可受吾驅策此一定之理今逞一徧
之見欲罷防夷兵專用鄉勇恐鄉勇出此而驕益輕諸營
設有反覆誰爲制之且以素怨之兵見文官偏用鄉勇必
怒一旦爲變曹丞能率鄉勇以討叛兵乎縱使能討必益
長臺人之亂禍不旋踵矣東漢董卓唐代藩鎮之不可制
皆由先假外兵以平內難所致可不戒之哉自古師克在
和臺灣孤懸海外全賴文武同心官民一氣庶幾眾志成
城豈可顯爲畛域廢本司道數年調輯苦心若如曹丞之
見是必無臺灣也其可乎哉

臺灣防夷經費請作正支銷狀

辛丑正月初四日

道光二十一年十二月十八日准省局司道咨奉憲臺牌開
現准 欽差大臣伊咨定海夷船已經起旋南旋赴粵
聽候查辦浙省業已裁撤防兵閩省更應一律撤兵以節
糜費除咨行裁撤外合亟飭遵備牌到局司道卽速移行
汀漳龍興泉永二道福興泉漳福甯各府飭屬查明防禦
各項事宜支用及驛路各縣例應支付兵差用過銀數剋
日造具草冊呈核不准絲毫浮冒儻察有浮冒除核駁外
仍卽嚴參懲究至臺灣澎湖防堵各事宜會發給澎湖番
銀三千元交存泉州府庫會否領去臺灣未曾領帑爲日
亦屬較短是否由該地方官捐辦抑應作正支銷卽飛速
移行該道府查復等因奉此先於前月二十九日奉到憲
牌遵奉 諭旨將各海口雇募漁船水勇撤退以節糜

費責成各鎮訓練弁兵嚴防海口欽此查臺灣防堵事宜自上年六七月間夷船屢至臺澎窺伺隨時擊退之後卽經職道會同達鎮督府悉心籌商部署各路除澎湖一廳隔海移飭該副將通判妥爲籌辦外經於九月十八日將查明臺灣南自鳳山縣北至噶瑪蘭廳最要次要海口十七處相度地形建設礮墩分派員弁兵勇共用防夷弁兵三千四百八十一名屯丁二百名鄉勇二千四百六十名水勇五百二十名按口開具清摺繪圖貼說稟送憲臺察核並會摺奏明在案除六七月以前僅一二處轟逐夷船爲日無多經費有限由在臺文武隨時自行籌辦無用議外自九月初一日起各口一律設防至年底止鄉勇屯丁陸續減撤時經四月地盡全臺各廳縣用過經費皆遵職

道先定章程核實摺節用過實數隨時報明在局茲據臺灣府知府熊一本暨局員臺防同知仝卜年查明共發過礮墩器具旗幟號衣民船等項雜費番銀一萬三千六百餘元時價一三六折銀一萬餘兩鄉勇水勇屯丁八分口糧番銀二萬五千二百餘元一三六折銀一萬八千五百餘兩原派弁兵係分班輪守除下班不給費外實給弁兵三分鹽菜銀六千零九十兩三錢該府隨時稽覈尙無浮冒職道伏思臺灣四面重洋南北綿亙一千四百餘里港汊紛岐除大船不能出人之小口不計其最要大口已有七處次要小口十處皆不可不嚴加防禦名雖一郡實兼有福興漳泉四府道里之長而海外孤絕無援民情不靖較內地更爲吃重將禦外侮尤防內姦辦理情形亦較內

地倍難兵勇既不能少經費不得不籌現據府局查明約計郡城及各廳縣自上年九月至年底止用過兵勇等項口糧雜費紋銀共三萬四千六百餘兩若責成地方官捐斷無此力職道督同該府悉心核議所有道光二十年用過弁兵鹽菜及屯丁鄉勇水勇口糧兩項共銀二萬四千六百餘兩應請作正開銷此次經費並未領帑先經稟明在於噶瑪蘭未入額田園歷年征存穀價項下動支先後提用番銀一萬九千三百二十元合銀一萬四千二百零五兩七錢一分零尚不敷正銷銀一萬數百餘兩該府在於上年憲發本年春夏二季兵餉內暫行挪墊伏乞憲臺俯念海外防夷重務准將二十年用過弁兵鹽菜及屯丁鄉勇口糧二款作正開銷並將挪墊本年兵餉一萬零四百二十一兩先發交領餉委員齎發來臺歸款至建設礮墩製備守具一切雜費銀一萬餘兩俱係各廳縣挪款墊應如不能作正開銷似當分年捐攤歸補第省局如何辦理未能懸揣儻內地各府屬用過雜費統准作正支銷臺灣事同一律辦理未便兩歧則竟請將臺屬用過雜費同口糧鹽菜一并作正支銷俟通局定後如有例不准銷應行攤捐之處仍與通省一律分年攤捐方爲妥洽而免事後周章至澎湖隔海上年防堵緊要蒙發給經費番銀三千元尙恐不勇職道於上年王丞赴署任時亦在蔣廳未入額田園征存穀價內提出番銀一千元交王丞齎往備用前此署廳孫化南用過防堵經費係挪用何款銀數若干泉州府存貯奉發之番銀曾否領回此外有無不敷之

東洋文後集 卷之五
處屢次飭查未據該廳將用過數目造冊報核容再飭催
查復一面飭在臺廳縣將用過經費分款造冊另文詳送
抑更有請者臺灣今昔情形迥異文武各員辦公久形竭
人此次防堵雜費皆係挪墊款項無多歷爲軍需挪墊殆
盡尙待分年歸補實已無可再挪而夷情反側不定卽道
庫備貯十萬兩經兩次逆案奏明動用外僅存五萬五千
餘兩此係專案要款不敢輕易動用現在仍有防堵事宜
實屬無可支應設海外有警內地不能飛渡接應所關匪
細查前任吳藩司曾建議請奏再撥捐監銀十萬兩發臺
備貯其事未行惟有仰求憲臺俯採吳藩司前議體察現
在情形入奏一面飭司籌撥銀十萬兩卽附本年大餉來
臺酌給若干支應防堵事宜餘仍存貯道庫以備不虞實

爲要著萬一洋面阻隔亦可濟一時之用管窺所見是否
有當仰祈察核飭交省局司道迅卽籌議施行

廈門有警臺餉不敷狀

辛丑七月二十六日

臺郡自六月以後厦船不到粵中夷務無聞省厦文報亦
形隔絕七月二十日忽聞鹿港行商傳泉商信言本月初
十日有夾板船三十四隻突至厦洋爲草鳥賊船勾引直
犯厦港焚搶鼓浪嶼等語聞之不勝駭異併據鹿港廳彰
化縣飛稟到郡所言大略相同伏思厦門重兵所在防守
最嚴傳言恐尙未確隨令覓僱快船飛往偵探臺灣孤懸
海外全恃厦門爲援今有此警未免人心惶遽民情浮動
之區尤堪危慮雖自十八年秋閒先經職道收養嘉章游
民八千人編造入冊上年招募各屬鄉勇水勇二千九百

餘名給予口糧分防海口復勸諭各莊總董頭人團練壯丁二萬二千七百餘名造冊候調藉以安固人心潛資約束比年在地匪徒尙無煽動然前此閩洋夷船并無大幫今廈門忽傳此信誠恐無知匪類乘機搖動甚或潛通海賊轉引逆夷來臺滋擾事勢實爲亟切當同能守昭商達鎮飛飭陸路各營將備除存城弁兵不可動外所有外汛弁兵酌量添撥馳赴海口協同在地文武委員防守職道飛飭廳縣酌調各莊總董帶領團練義勇到口添防一面移會巡洋舟師一檣收回嚴守口岸郡城與廈門對渡根本迫近口門不可過多議將鹿耳門廢口同國賽港三鯤身三處口門用在廠不堪修葺哨船四隻並買民船十五隻加以大木桶數百箇裝載碎石預備臨時填塞庶免匪

船遠越以便專力安平連日督同府廳縣勸諭紳商各募義勇稽查宵小府城本係土築每易坍塌四縣隨時修葺歲款無多工料不能堅實先經熊守會營周歷勘視動項興修不日可以完竣至西北沿海一面紳士前造外城沙土質鬆城基近水早已坍塌今於外城內自小北門起繞大西門至小西門周七百一十一丈密樹木柵以資捍衛惟臺地紳商久形罷傲郡城郊商生理多在廈門聞警之日無不驚惶事勢迥非昔比極意拊循慰勉始覺鼓舞奮興遠近士民亦聞招卽至察看民情似尙可用最要者上年以來通臺十七口設防兵勇眾多計原設復設添設現共用弁兵三千九百三十九名鄉勇水勇屯丁六千四百八十名口糧鹽菜增加一切攻守事宜皆需整備爲時歷

久經費不貲上年係道府廳縣籌款墊應本年始蒙發銀十萬兩由職道隨時酌核飭行府局樽節支應現在僅存四萬三千餘兩查各口防夷兵勇等項每月本已需銀七八千兩今廈門有警又添防兵勇每月需銀一萬二三千兩儻夷匪猝來用費更不可勝計即奏動道庫備貯亦不足濟事蓋道庫十萬已經兩次軍需動撥僅存五萬餘兩若不亟籌接濟必悞事機現據熊守稟請省局籌撥經費銀三十萬兩實不爲多海外情形久在洞鑒之中自必俯如所請儻司庫籌撥維艱不能一起給發務請憲臺飭商省局司道剋日先發十萬兩迅委廳縣幹員由五虎門對渡八里盆於九十月內解到應用餘於年內或正月間續發十五萬來臺以資接濟職道督同熊守覈實度支斷不致有虛糜儻有餘存即可以補還道庫備貯之款至澎湖經費餉銀尙須省中另行委解儻若廈門有梗卽祈酌發銀五萬兩併交此次委員由五虎門解來臺郡再封僱安船仍交省來文武人員解往澎湖距廈尤近更爲緊迫也再有請者臺地海口綿長一千四百餘里不但守口管帶壯勇需人卽督同紳士義民稽查地方姦細押解各處餉銀在在需員差委臺灣現除實卸署事守口各員外在郡惟卽用知縣王廷幹一員候補府經縣丞龐裕昆一員候補縣丞吳湛恩一員差委遣用乏人上年曾稟明畱委因公革職之候補同知前臺灣縣知縣託克通阿在安平督帶裨勇並委丁憂之候補同知卸署澎湖通判徐柱邦在澎湖協全防守今澎湖有王提臺駐守徐丞可調回郡差

遣此外仍係乏人祈憲臺行司遴選精明幹練之雜職二三員飭令來臺差遣委用又省城及臺地往來文報向由廈門行走緊要之件則另用一副由蚶江鹿港并行而蚶江以非正站每多延滯伏乞憲臺飭行泉州府蚶江廳嚴飭口胥遇有臺灣文報務填月日時刻立即發行並令泉州府城內設一官胥管理往來文報登記號簿一體查考是爲切要

再上督撫請急發臺餉狀 辛丑七月二十九日

前月二十日聞廈門有警臺灣防備宜益加嚴府存經費無多稟請憲臺飭司道局籌撥銀三十萬兩以備支應且分給澎湖正發行開準王提臺七月十七夜自澎湖來函言得家書夷匪勾通草鳥賊船於七月初十日進入廈港官兵不利退保同安澎湖軍需已盡尙虧兵餉商由臺庫撥銀一萬兩番銀一萬元並據澎湖協詹功顯及該署廳玉庚移稟前情專差把總謝燿請領前來職道查廈港既經失守澎湖及全臺同時震動海外浮動之區尤堪危懼昔之所慮者英夷與在地姦民今則兼慮成幫之草鳥盜船與沿海之土匪臺灣地亘一千四百里要口十七處小口倍之內外交警水陸兼防海外孤立情形唇亡齒寒尙未足喻雖憲臺經略有方大集師徒廈島可卽時恢復而海外謠傳莫辨真僞且臺鹿兩處郊商大半家於廈港自聞失陷一日數驚匪類復加謠播有非示諭所能鎮安者內地旣無可請撥之師海外不可復置用兵之餉廈門於六月十一日裁撤義勇千九百人甫一月遂有失陷之事

東海文後集 卷之五 三
則是義勇不可驟裁已有明驗夫以厦港兵卒之多石壁
之堅重以大担門內各與防備之密而鼓浪嶼後尚爲夷
匪所乘則是大小口一槩皆須添設兵勇安得如許熊羆
之士不竭之藏自當斟酌人地量度情形要非庫餉空虛
所能措置伏乞憲臺俯念海外危切准如所請委員解給
一函專摺入奏實爲至要本當由臺員奏緣未見內地明
文恐乖事實是以未敢冒昧想在仁明之所燭照也至澎
湖軍需既已告盡現在厦門有梗誠恐省餉不能卽應不
得不通融暫撥業已飭府在所存經費內暫撥銀五千兩
番銀五千元先予解給以資接濟惟是臺灣經費轉更乏
竭實已僅勇三日之需矣合併陳明
昨見蜡江廳移鹿港廳文知劉道以大兵在泉州缺食稟

請招商赴臺買米不論大小商船一槩免配官穀足食之
策誠爲緊要殊不知商船趨利若鶩一聞缺食之區無不
爭先販運何待官招不過商民規避官穀以此爲名耳此
時收拾人心免役利商亦無不可但所運官穀卽係內地
兵食既免商運此事豈可不等職道之愚惟有請將二十
一年臺運兵穀仍照上年半解折色之法全數由藩司發
銀分給內地各廳縣以濟兵食其餘一半俟內地兵食充
足海洋平竣之後再復商運舊規抑或仍解折色之處現
飭臺灣府廳妥議另詳辦理惟折色解銀臺屬廳縣賠累
甚鉅卽內地各屬亦所不願祇可暫行變通事平仍復舊
章爲是至南灣兵穀此時無船可配亦應俟商船到臺郡
時方能配運耳

臺灣不能堅壁清野狀 辛丑九月

八月二十四日奉憲臺札飭逆夷船堅礮猛沿海若與交鋒萬難制勝不如誘之登岸四面壘伏截殺所有原設海邊大小礮位亟須移徙內地十餘里或三五里之阨要隘口不令窺見如其船至海邊即令沿海居民避徙內地協同我兵埋伏鳥鎗擡鎗擡礮長短各械俟其上岸時至隘口先用大礮轟擊繼以圍殺又奉札飭各處港口必須堵塞除面臨大洋及內港退潮水深止七八尺者及荒僻口岸不必計議外如有港口退潮水深丈餘夷船能以闌入之緊要內港速即購備竹篾破船裝滿沙石分別填塞其夷船未到之時中間仍留小口以便商漁船隻出入如遇夷船竄至再行一併填滿以杜夷船聯艘闖突其由海岸登陸及要隘之地如可挖濠即迅速開挖寬深或暗埋蒺藜等物仍將何處緊要應辦緣由稟覆督核等因奉此祇聆之下仰見深燭夷情指示機要洵爲避實擊虛之良策當即飛飭所屬各按地方情形遵照辦理伏思用兵之法攻守異勢攻以曠野爲利守以險隘爲宜而地勢不同民情差異則有未可一概論者自古守險非依山則據水平陸則深林密箐皆可爲守臺灣惟噶瑪蘭之蘇灣淡水之雞籠滬尾三口係大山高聳中夾口門可以據險憑高餘皆沿海平沙一望無際口門悉在水底或有沈汕暗礁可陷敵舟平時口門皆插竹爲標以進商船有事即去其標故稱天險然亦僅數處大抵水口淺狹非夷人之所以必攻餘皆無所據依守者極難立足自當退而設伏不與近海

交鋒然而其難有五海畔平曠村莊散漫處處可行並無扼要之所其難一也沿海之人十九皆窮其心叵測綿亙千數百里人口繁眾遷之則無地可容無業可活置之則引敵登岸無所不爲其難二也臺地惡習最忌遷移匪徒每欲爲亂則造言恐嚇居民遷徙乘閒爲亂其難三也沈舟載石固可堵塞口門然無兵勇守之則堵者仍可以開塞者亦可以去其難四也臺人好亂無事猶造播謠言若撤退守口之兵則明示以官兵懼怯良者以爲官棄其民姦人益啟猖獗之志其難五也且如郡城西臨大海城外卽水僅恃安平一鎮橫亙爲衛安平地狹東西一里餘南北二汕迤邐相連今守郡城舍安平更無退步城係土築未可言堅雖欲堅壁清野而不可得展轉籌思惟有因地

設施以求萬一之濟石壁雖不足當巨礮而舍此更無可立足之區大礮雖不能破堅舟未嘗不可擊登岸之賊現更用大竹篾編爲夾牆互數百丈中實沙土高僅五尺其厚丈餘藉爲我兵避礮之具復挖長濠下埋釘桶以陷登岸之匪其港門內橫列大木數排上安千斤礮各二門以爲攔截更架棉包牛皮中藏勇士伺敵將近以礮擊之前以大木數百頭上釘尖銳大鐵撓鉤中貫巨籐以撓其杉板木排後用竹筏停泊儻敵礮破我木排則棄礮于水人登竹筏而退誘其登岸擊之支港內則釘梅花木椿以阻其闖突安平之北隔港六里爲四草亦砌築石壁夾牆七十餘丈內設兵勇礮位以防敵人佔據過四草五里則鹿耳門廢港用石填塞更六七里爲國賽港其處水口寬深

用不堪修葺哨船并買民船鑿沈堵塞港內仍設鄉勇屯丁對岸一帶復聯集村莊團練壯丁設伏以防登岸安平之南距礮臺七里爲三鯤身新闢港口水深丈許現用大木作水鹿角橫攔水中復用竹篾載石堵塞守以鄉勇復于對岸聯集村莊練勇設伏以待更南六七里爲喜樹仔小港地頗荒僻居民甚雜尤防草鳥賊船闖入亦聯集在地之莊社團練壯丁以爲伏兵郡城西面圍以木柵七百餘丈中安礮臺三座多設壯勇分守之郡城八門除弁兵外復募壯勇一千四百名授以器械分段協守城內各街分七十二境責成紳上舖民各募壯勇二三四十名不等共二千餘人多立木柵隘門巡防街道稽查姦宄此郡城設守之大概情形也郡城以外鳳山縣仍駐埤頭以竹爲城距海口二十里嘉義彰化二縣皆磚城距海口七十餘里淡水廳石城距海口十里蘭廳竹城距海口五十餘里而淡水之滬尾卽八里坌一水三十里直通艋舺彰化之番仔挖一水三十里直達鹿港此皆商民百貨所集闔閩之盛倍於城中杉板船皆可以至其次則嘉義縣丞所駐之笨港佳里興巡檢所駐之鹽水港市井頗稠皆瀕海數里幸港道淺狹卽夷人杉板亦不能至惟有懾遵憲示于各海口中擇其地有要隘可以退伏者將礮勇酌量分撤半守口門半爲埋伏誘其入而殲之儻或地勢不便則量爲變通辦理以期仰副諄諄垂示之至意

委員請領經費狀

壬寅七月二十八日

臺灣孤縣海外四絕無援亂民不靖于內夷寇數擾于外

東海文後集卷之三
地方遼闊海口叢立名雖一郡實互福興漳泉四府道里
之長戍兵班滿久切思歸驅策已非易事且水陸一百七
十餘處無非要汛調撥守口殊形單薄不得不多募鄉勇
水勇以助兵力兵勇既眾又自二十年八月至今時逾二
年軍裝口糧修城築堡濬挖濠溝鑄礮塞口製造器械一
切攻守戰具經費在在不貲又有澎湖一廳隔海時告急
于臺灣雖兩次委員解發銀四十萬兩又另給澎湖銀一
萬五千兩番銀三千元經費不爲不多無如兵勇既多時
日復久伏思道光二十年二十一年兩次俱經開具全臺
各口兵勇清摺通送憲核在案計自二十一年七月廈門
失守是時一廳四縣十七口二次摺開防夷兵共三千九
百三十九名鄉勇水勇屯丁六千四百八十名及至八九
月後夷船再犯雞籠南北兩路土匪相繼通夷作亂四縣
添設防夷兵八百一十九名壯勇屯丁一千九百五十名
連前共水陸弁兵四千七百五十八名水陸壯勇屯丁八
千四百三十名至于夷來打仗數次臨時添調兵勇及南
北兩路剿辦逆匪征調堵禦之兵勇尚不在此數內以逆
匪作亂時雖經職道奏撥道庫備用銀三萬兩尚有臺灣
府挪動兵餉銀一萬七千餘兩墊應省發防夷經費到臺
不得不急行歸還至於澎湖一廳先是兵勇尚不甚多及
王提臺移駐之後凡用防夷兵一千五百九十九名鄉勇
水勇一千二百一十三名所有省發經費除歸還二十年
九月至上年七月外已屬不敷上年七月至今皆係臺灣
撥給又不下五萬兩此時似尙可支數月而臺灣則自上

年十二月時府庫已僅存十三萬餘兩支應各屬至今僅存三萬有奇職道深慮經費維艱防夷兵勇無不先定章程俾各屬遵照給領隨時開摺申送該府復同局員臺防同知全卜年時加稽覈絲毫不准濫應其派添兵勇相時酌量減撤而逆夷屢次犯境復時有大幫報復之謠卽如三月閒果有夾板十九隻來臺欲購在地姦民內應雖將其導引羽翼之草鳥匪船擊敗夷無內應潛行遁去而各口戒嚴不敢稍疏日夜此其極力撙節不得不用之苦衷想邀明鑒本年職道會同臺鎮據實奏蒙 聖恩准再賞撥經費銀五十萬兩解閩以備臺灣提用約計此時各省當有到者茲當用度告匱之時謹委淡水廳大甲巡檢謝得琛赴省伏乞憲臺行司卽先發給銀十五萬兩添委幹員協同謝巡檢由五虎門配船齎解來臺以便支應俟至十月閒再撥給十萬兩解臺更爲德便

夷船復來臺洋遊奕狀

壬寅八月

本年三月閒逆夷大幫船隻勾結草鳥匪船來臺冀圖滋擾經文武官兵義勇擊破草鳥船多隻擒獲姦民匪犯訊辦夷見無隙可乘潛引大幫遁去緣由業已具摺陳奏錄報在案乃夷船已去而草鳥匪船仍復往來各口伺劫復有彰化巨匪黃馬等聚眾專俟夷船到口作亂又經本職督飭文武先後擊破殲擒分別審辦茲于八月初五日接據臺灣水師協邱鎮功臺防同知全卜年及文武委員義首人等稟報是日午刻瞭見國賽港外洋有三桅夾板夷船一隻自西南駛來山西北外洋而去等情本職當卽飛

行各文武將各處壯勇酌量添設慎密防範續據探報該

夷船於是夜三更時在國賽港迤北之馬沙溝外洋北汕

停泊當飭印副將督帶水師商哨船十九隻及水勇竹筏

多張駛往攻擊併飭國賽港委員候補同知徐柱邦督率

守口壯勇在岸陳列防堵本職立本職即會帶兵勇出駐安平

督率辦理初七日申刻據報該夷船見我兵勇嚴密即插

起白旗施放空礮於初六夜乘潮逃駛師船追望無蹤而

回本職隨會同在安平演放礮位勘閱重修礮墩土壁事

竣于初八日晚同回郡城初九日未刻又據各口報稱有

夷船一隻在鳳山縣之打鼓港南外洋漸向西北駛過四

鯤身四草湖外游奕於申酉刻閃復向外洋駛去無蹤各

等情前來查連日皆西風該夷船是否前後兩隻抑即係

前此之船被風打回復行駛去均未可知但望見師船及

岸上兵勇立即豎起白旗則其不敢近岸攻戰情形顯然

可見然夷情詭詐防範不可稍疏除飛飭在口文武員弁

義首添加壯勇認真防備一俟近汕相機攻擊並會稟將

軍督憲分銜稟咨撫部院外合將夷船復來遊奕駛去情

形稟報憲臺察核

風聞廈門夷情反覆狀 壬寅十一月廿四日

前月廿日接據護送夷人往廈委員盧繼祖張肇鑾等稟

稱遭風夷人二十五名及夷目顛林等九名均已到廈交

收惟因顛林等在澎湖候風兼旬到廈稍遲廈門謠言四

起以致鼓浪嶼夷會疑惑大生怨謗以為臺灣兩次破獲

夷人皆係遭風夷商不當正法等語職道不勝駭異前次

來臺夷官業已感服極爲恭順何以鼓浪嶼夷酋忽生異議僕鼎查在江蘇與 欽差大臣議定一切和約章程言定浙江福建廣東等省未接議和之信以前儻有攻擊夷船均當原情免議豈得顯違條約此端一起則向後各條皆不足據憑何信守至兩次來臺破獲之夷俱在未議和以前兩相爭戰彼此仇讎卽係遭風夷船尙當拏辦何況並非遭風商船現有原供及起獲船上礮械及廈門浙江營件浙撫營員印文冊摺現在貯庫確憑何能支飾竊意僕鼎查所到之處無不縱橫如志惟獨臺灣連遭挫衄有損彼威其恨可知諱敗誇強亦無足責但和議甫定不當有此一節誠恐訛言日久以僞亂真於大局必有關係憲臺必有先聞自必定策權衡以全大局事關夷情反復

職道既有所聞關係重大不敢緘默是以會達鎮據實上

聞言皆切直並無一字涉虛至夷情實在如何海外

無從揣測伏乞憲臺指示機宜是所幸禱再有請者夷情

詭詐多端難以理爭亦不必以一鎮一道而礙 國家

大局使海外又啟兵端職道愚見夷人深恨臺灣敗衄之

恥故爲此舉且彼旣在廈門設立馬頭而臺灣與廈門對

峙鎮道二人在臺於彼諸多不便故爲此謀欲去其所忌

未必眞爲正法之夷人抱屈也若鎮道更易似可相安惟

有仰懇憲臺密以此意奏 聞先將鎮道撤回候

旨一面善與之言不失 天朝之體彼見去其所忌自

亦無所藉口儻蒙 聖明垂鑒別賞差使則易地亦可

報効不必定畱在臺免致牽動大局似爲妥洽謹密陳

覆廉將軍乍雅給諭狀

道光二十六年十二月二十五日奉憲臺札開前駐藏幫辦大臣瑞奏行抵察木多查悉換防弁兵被阻情形據乍雅大呼圖克圖稱此次阻止官兵實因本年委員查辦夷案回川時給有印諭內稱六七月閒定有委員前來查辦若逾期或斷路滋事不與伊等相涉百姓因此不肯支應烏拉等語旋據各頭人將委員等所給漢蕃字印文諭單呈驗文字又復兩歧虛實無從質證等情奉 上諭委員等發給漢蕃文字不符之處尤應隨案查明勿使藉口欽此查宣守等所給諭單其間究竟如何書寫因何漢夷字句兩不相符該牧亦係一同發給諭單之員自應先行詢明以憑將來會辦札到該牧即速束裝來省面爲查詢等因奉此卑職遵於本年正月初八日到省經將前給漢字諭文并無翻譯所有蕃字乃該夷人自行添捏情形面稟仰蒙憲鑒矣伏查道光二十五年正月卑職等自察木多回省係分兩起行走宣守于正月初四日先到乍雅已過卑職同丁倅後數日方到乍雅據該處頭人呈遞夷稟求爲帶省轉遞并以宣守所給印諭呈閱查原諭內但稱據乍雅六站頭人呈遞夷稟求爲轉呈中堂收閱准其帶省呈遞該頭人等候至六七月自有飭知遵照等語并無逾期或斷路滋事不與伊等相涉之言該頭人等復以所遞夷稟求卑職同丁倅轉呈稱係訴說二呼圖克圖等罪過之事恐墜于上聞再三求給准呈諭單當與丁倅商酌夷性多疑若不收其呈詞給諭必疑卑職等別懷意見藉

此刁難又生枝節况宣守先所給諭本已列有四委員之
銜是以照前諭寫給只有漢文并無翻譯蕃字緣出鑪關
時明正土司所派譯字書喜樂彭錯一名通事彭錯一名
係隨同正委員宣守先行卑職同丁倅分爲後起僅有通
事彭錯一名及察木多回途仍分兩起行走故卑職與丁
倅隨行併無譯字之人乍雅聚頭人領去漢諭自行翻譯
作何添入斷路滋事不與伊等相涉之言卑職等無從知
悉此卑職等給與諭單漢蕃文字所以不符之原委也查
乍雅大呼圖克圖與其屬蕃本刁狡異常屢次誣捏之詞
已成慣技此次委員僅給漢字諭札准子帶呈夷稟并無
准其撤站輒敢自行翻譯添入斷路滋事與伊無涉之言
以爲藉口鬼蜮情形何能上逃明鑒事關入 告恐前日
面言無由備案謹更據實稟覆伏祈察核施行

東溟文後集卷之五終

東溟文後集卷之六

桐城姚 瑩展和甫

復管異之書 己丑

異之足下遠承惠問勞苦愁寂之中如親笑言又以僕起復有期慮其好熱鬧而不節用甚非今世所宜懇懇諄諄誨所不逮非相愛之深不能爲此言者頃得左匡叔書亦謂近日士大夫多修飾小節以爲進取而光栗原亦以謙謹相誠三君之言何其若合符節也三復規箴感歎不已僕今年四十五矣讀書二十年游歷仕途崎嶇憂患者又二十年不應憤憤然亦竊有微衷請爲足下言之夫志士立身有爲成名有爲天下惟孔孟之徒道能一貫其他蓋不能以同趨矣爲名計者謹言行飾廉隅此鄉曲自好之

東漢文選卷之六
所求也自東漢以虛聲徵辟天下爭相慕效幾如今之攻
舉業者孟子所謂修其天爵以要人爵也當時篤行之士
固已羞之明季東林稱多君子天下清議歸焉朝廷命相
至或取諸儒生之口固宜宇內澄清矣然漢明之季諸君
子不能戡定禍亂反以亡其身者無亦有爲天下之心而
疏於爲天下之術乎天下大矣不可以一言幾也有開創
之天下有承平之天下有艱難之天下開創人才無論矣
承平者務在休息教養士大夫言論從容坐鎮風俗斯謹
飾文雅之儒所以垂休聲也及乎承平日久生齒繁而地
利不足養文物盛而干盾不足威地土廣而民心不能靖
姦僞滋而法令不能勝財用竭而府庫不能供勢重於下
權輕於上官畏其民人失其業當此之時天下病矣元氣

大虧雜證並出度非一方一藥所能愈也今夫求馬者於
冀北蓄蠶者於江南稼問農蔬問圃天下艱難宜問天下
之士而與鄉曲自好者謀之其有濟乎奇才大略不世出
必不在修飾邊幅中也漢明之季諸君子所爲視今何如
吾猶不能無憾又况其下焉者哉且世之善爲修飾者初
亦何能自好不過視時所尙爲之上以是求下以是應猶
之夫攻其舉業云爾立身求己之實蓋未究心焉尙謂有
恫瘝於天下乎夫謙謹者君子之美德然既受人之爵宜
憂人之憂食人之祿宜任人之事今於爵祿則取其大者
厚者而於天下事則爲其微者細者曰是能謹慎俱職吾
不知所職又何事也嗚呼一生謹慎武侯語也乃以爲趨
時之具無怪孔光張禹者流比迹於千古是亦大可痛矣

且夫舉業趨時者可以數變其文體爲人而趨時數變將何以立身蓋通塞者命也好惡者人也吾之賦命有定而人之好惡難齊命苟塞矣關略者固非曲謹者亦可罪也今日關略明日曲謹不且兩失之乎吾愧道不足以濟世才不足以救時乃其志則不欲曲謹求名聊存其面目於百折崎嶇之後而不敢變者意亦有所差也異之責其好熱鬧夫好熱者必熱中熱中者必慕勢異之視僕亦嘗慕熱否耶三至京師足不及權要之門三爲縣令未嘗降志於督撫所熱鬧者海內節義文章之士賢豪踈弛之人耳數厄當道鬱塞困頓或跌宕於詩歌酒肆以發其無聊此學問不能養氣耳豈好熱哉若夫節用之說固嘗思之然以家無儋石之人生平結交當世賢豪以此贖其父母妻

子以逮五服三黨數十口無凍餒者二十餘年矣生平無聲色服食珍玩起居之好嘗負官責巨萬然在官未嘗妄取民鬪一錢及罷職去士民輒爭爲代償卒亦無錙銖之負國家人之於我何其厚也我嘗厚取於人而我之於人必用節焉豐之入而嗇之出得毋爲鬼神怒乎吾嘗少也不能悅人今老矣而塗脂澤粉以事後生異之謂我能之乎雖然君子者求反正以可常不詭儲以立異三君勉我以中庸之道將使之改過遷善則閭命矣勉以宜時則私衷有所未安敢盡區區惟登敘之

覆程中丞書

辛卯九月

昨陳倒塘一事奉憲批河防機宜非地方人員所能遽悉總須廣詢博問執端用中庶可不負委任飭卽會同廳營

察看情形隨時相機酌辦務使各幫回空軍船迅速星飛
南下仰見憲臺明察庶情於慎重公事之中寓造就屬員
之意竊惟服官之道當以慎勤爲本忠信爲質及乎治事
則首在識時其次因地又次觀人終于審事未有任心執
一而不乖誤者也卽以地方言之錢穀兵刑雖有成法而
用法之寬嚴緩急則又當體察而行時有異勢地有異宜
人有異等事有異情明乎此者然後可以無弊故或獄市
不擾而非姑息養姦或摘伏若神而非舞文深刻或豫備
幾先而非急或事至不動而非緩蓋治事如醫投劑可用
古方而辨證在乎切脈如明諭所云察看情形隨時相機
酌辦誠治法之要樞也然非廣詢博問則時地人事之異
何從而知非執端用中則寬嚴緩急之間安能悉當謹終
身佩之不獨河防機宜而已河防之事本所未諳非在工
年久目睹身勤縱使廣詢博問猶或未能了然執端用中
之難有倍於地方者如地形之高下曲直水性之緩急通
塞其事至粗已有經年在工而問之茫然者矣况其遠近
遷變倏息易形益非卑職之愚所能通曉此次奉委領塘
催運軍船本有成法謹會同廳營隨時相機辦理一俟軍
船出塘完竣卽回省銷差謹肅以聞

覆程中丞言莊午可事書 辛卯十二月

劉守備來常州傳密諭令回蘇州欽感無已莊午可以一
訟棍狡很惑眾數興大獄歷任有司往捕皆爲抗拒而回
畏之如虎病在養癰今以一知府三知縣會參將守備兵
勇八百人往復斃刃戕傷兵役而回事當入告非往日比

蒙諭此事只求免過不可見功誠荷慮事精詳昭示槁昧
自分孤陋何幸蒙愛若此職才識本疏此事又非職守前
奉飭查略報情事極知此犯姻族皆衣冠士類聲氣廣通
治之必遭非謗前求免給文札已邊鑒允詎十三日回郡
而文武不及相謀已先二日輕進債事奉諭而來不敢遽
去是以停舟待命適奉制府六百里檄文已調三營兵圍
捕令在常郡會辦二十一日又奉額臬司自無錫檄調從
軍詢商事宜本日面陳臬司以此間部署略定奉憲傳諭
往蘇告辭啟行臬司以即日進兵必令隨行又使人堅留
頗有託責竊思職今年初至江甯卻林藩司入幕襄事之
召在揚州還趙藩司隨行查賑之檄今在常州軍務倥傯
又違額臬司從戎之命雖見難而退亦君子所以立身而
自人觀之必謂輕視兩司跡同狂妄此所以展轉徬徨不
能自決也曩在閩中捕誅要犯巨盜逾數百人常恐刑戮
過重傷造物好生之仁猶幸械鬥劫擄之風稍戢閭閻安
謐又在臺時朱蔚謀逆及事未起破獲之僅誅首惡其黨
數百人解散以爲庶償刑戮之愆本年揀發江蘇冀以文
治從容無事搏擊乃本願未償又奉此檄實所不期此犯
奉 旨捕之五年負隅未獲眾知其難即使克擒亦恐
不能免過安敢言功憲諭誠爲明哲俟可脫身卽赴省面
聆訓示感激之忱有非筆墨所能盡者

覆陶制軍言鹽務書

乙未九月

日昨奉命至運司署檢鹽案諸卷按年摘要以備查考連
日逐款摘開清摺十二件於三十日戌刻呈都轉閱定馳

送行次計達鈞覽矣伏思此次開呈各款因爲時倉卒僅自嘉慶二十一年起至本年止凡二十年綱盤之起運岸銷統帶奏銷征存報解以及商借帑本報効外支歷年大數可以一覽瞭然計丙子至庚寅十五年中運鹽之數僅丙子丁丑己卯甲申乙酉戊子六綱全運辛巳壬午癸未丙戌四綱則折半行運戊寅亡丑庚寅三綱則分綱帶銷丁亥一綱全統庚辰鹽雖全運而課仍分年帶征未有如辛卯壬辰癸巳甲午四綱連年全運者也奏銷之數計二十年爲銀四千四百餘萬而辛卯壬辰癸巳甲午四年乃九百餘萬此皆以多爲美者也征收之數正項今昔略同惟雜項一款昔年多者六七百萬今則年裁一百一十萬耳蓋昔人以財爲悅先私交而後公義進於內者惟恐不盈賸削脂膏搜剔骨髓泛泛然有所不顧是以商力竭而運庫空虛今則急公義而絕私交取於下者必量其力裁革浮費減輕課本亟亟焉培養不遑是以商漸裕而運庫充實此則以少爲貴者也自古善謀國者必因其本故保民而後有賦保商而後有稅世安有民窮商困而賦稅能長盈者乎有嘉慶中年之極盛斯有道光初年之極敝相去不三十年前人之所以得正前人之所以失也明明覆轍而議者猶以爲美競欲復彼舊規此豈謀國之勝算哉夫局中之事外人不知由不見故也今吾傾筐倒篋臚而出之則道旁之人皆能舉數矣使彼洞然於今昔先後之數與所以贏絀之故則得失之理人將自明不事喋喋與辨瑩之愚計思作嘉道以來鹽法表編年於上而以

東坡先生集卷之六
十二款者分十二層線註於下使不曉鹽務者亦可展卷洞然得失見則是非自明可以示天下信後世而都轉意爲不可故不敢多請而意則有未盡也嘉慶中鹽務最盛莫如乙丑以後前鹽政阿公在任之日今獨此十年未得查開而歷年鹽政運司之任帥及巨商之成敗皆大關係亦未能備悉雖由倉卒亦缺憾也商人資厚而運鹽多實乃國課之根本昔歲運十萬引以上者眾今則五萬以上卽爲富饒矣若查取歷年某商行運五萬以上幾家何年長消何年倒罷使人考之亦見今昔司事之難易儻以尊意更索諸都轉發下俾瑩得見之可乎

覆賀耦庚方伯書

丙申正月

竊瑩凡陋下材附青雲之末二十九年矣浮沈下吏不獲

一侍清言然大君子治績聲稱上結九重之知下逾嶺海之外士大夫操觚從政者無不仰爲當代偉人瑩之景行更當何如也曩歲友人示以巨製經世文編伏讀旣終甚歎賢哲所爲宏卓匪是不足爲明體達用願以芻蕘一孔之見亦閒蒙採錄其言且感且驚思以一函自通而疏賤中慚申紙復輟者數矣上年冬從陶泉都轉所遞到賜書咨及閩事所以待瑩者甚厚誠非所敢當也沈疴未瘳逾月乃起又有護理運符之役巖務煩冗瑣細不遑作復今茲稍暇謹對以所知竊謂爲政之道非一所貴在乎因地得人或弛或張惟用之當而已自古治邊地者莫先威惠闢自大儒閒出文物聲名媿於齊魯然實山海交錯悍陋之俗未能盡除也漳泉之械門臺灣之好亂無論矣

卽延建汀邵諸郡與江浙接壤而盜賊會匪出沒盤踞類非安靜文弱之吏所能治者惟福州福寧二郡屬或庶幾耳夫人材各有短長視乎上之器使爲地擇人當先其大而後其細威惠並著者上也強毅有爲者次之明習吏事者又次之應對便捷虛言無實皆足以害政未可用矣閩海巖壘水陸二提督陸路建甯一鎮汀州一鎮漳州一鎮邵武興化二協水師金門一鎮海壇一鎮南灣一鎮閩安一協而海外又有臺灣一鎮安平澎湖二協大小將弁數百員兵卒七萬數千有奇此用武之國也 國家昔嘗有事以定叛亂有餘今方太平以捕盜賊不足此其故何也大吏多文儒不習武事諸將皆以趨承交結巧取升階而弓馬技藝委諸弁兵風雲沙線委諸舵工水手宜其不可用也苟欲講求必從上始拳勇戈矛火器弓箭風雲沙線有能嫻熟猛如彪捷如猱者皆不次而拔諸行間習其勤勞作其勇敢恤其疲乏風氣所趨下好必勝何致歲費百萬金錢養此無用之惰民哉苟不講練於平日惟責以不能捕盜雖日事參革有不勝其參革者矣是當留意者也今天下州縣甚苦疲瘠而閩尤甚蓋牧令辦公惟賴錢糧之有羨餘閩民抗欠成風歲征常絀不但羨餘不足供用且多方墊解以免處分安能不疲且困嘉慶中董文恪公帥閩福清生員聚眾抗糧文恪嚴捕其魁立請 王命誅之奏入 上以爲是各屬錢糧一時頓起旋遇 恩詔豁免天下積欠民間又存僥倖之心至今欠風熾熾愚以爲自非災荒必當嚴辦欠戶否則不但司庫奏銷

東坡文後集卷之六
時形支絀牧令虧空亦以愈多徒事撤參豈有濟哉臺灣
一府孤懸海外積貲必使長盈而臺地正供所入皆米穀
地丁銀款僅足支各官廉俸臺鎮所轄水陸十三營弁兵
一萬四千有奇俸餉馬乾皆需司庫解往歲常二十餘萬
此誠不可緩者特款日繁多常苦轆轤其大端有三一日
截曠二日換班三日借支隔海行走往返動輒經歲然不
過遲延月日猶可稽也積弊難清則在司書提塘之勾結
蓋將備不諳例款惟書識是師書識則惟提塘是賴於例
各營餉乾皆由臺府支給彼惡其近而易稽也往往越府
而求諸司空空白文領盈箱滿篋皆在提塘之家謀諸司書
而時用之以故轆轤益甚臺府詳查准駁仍懸司書之手
無由破其姦欺儻清弊源非從此究絕之不可以上所

皆昔在閩中知見者如此今去閩久情事或又有更易且
閣下以明睿之資負果毅之力當機立折固無俟於鄙言
而猶曉瀆左右者不願虛善人受言之問抑欲假此求大
君子之教也儻蒙誨其不逮是則所深幸耳陶泉先生竟
病不起其遺缺 聖明簡放劉星軺都轉現在常熟可卽
來瑩俟交替後卽擬請咨引 見肅此具復

上林制軍言西商脚私書 丙申三月

瑩於本月四日接護運篆今已旬日兩淮公事繁重本多
未諳逐節講求未易得其要領大約運商疲乏當恤其隱
情票貲散漫當約以紀律場產各有豐虧可以相時調劑
岸銷每形短絀必須嚴緝透私而其中情變萬端慮有所
窮勢有所格惟在得人經理乃地越數省人逾百族在官

任使既無如許賢員諸商亦無如許得力之人分置場岸
蓋大計則關乎國用而言利實盡於錙銖利在則爭
趨利亡則不顧以視州郡之可以法齊理喻者情形又有
不同前者鹽法做壞帑盡課懸自改制以來雲汀宮保與
陶泉都轉大力斡旋同心宏濟乃得五年全運四屆奏銷
商本漸盈庫貯充足成法粗定人心稍安憲臺復運以精
思益求美備瑩可隨事仰承訓迪庶免愆尤耳昨見江西
來信知江船夾私一案搜獲子店帳簿訛有端倪張守已
稟憲轅請從嚴辦竊以江船夾私本干例禁旣已獲破嚴
辦誠宜微聞張守欲因此延及岸商則過矣蓋商鹽一上
江船成本鉅萬懸於船戶之手雖有商廝押運而形勢孤
單恐懷不測船戶沿途收私盜賣亦無敢如何惟求包內
引鹽無缺或少缺卽爲大幸斷無通同使帶腳私自礙綱
鹽之理及至江岸則文武官人具在船戶始有畏忌交起
鹽包心虛情虧慮恐岸商家丁及管倉之人收鹽挑剔不
免給予規費此乃相沿數十年之陋習不特岸商知之卽
揚南明知而任聽因慮船戶之以包鹽爲規費也故水腳
每引比楚鹽加倍六錢夫江西路近於楚而水腳反多者
正爲此耳如其可裁揚商何肯甘心加價乎計無復之而
出於此此其苦衷亦可憫矣船戶貪心不足水腳旣盡復
帶腳私卽以私鹽變價爲交鹽規費所稱九十三兩者卽
此費千引千包者亦卽此費也故謂岸商知之而不能禁
則可乃謂以此牟利豈其然哉計西省額鹽二十七萬有
奇每年行銷不過二十萬而商人岸費幾四十萬兩利少

東漢文徵集卷之六
而費重揚商苦之皆欲避而趨楚每緡派運運使格外體恤而江船戶猶不愿裝西鹽每屆寫雇各商亦格外津貼此其病皆由岸費之重使然費何以重由鹽數少故攤派多也張守不察乎此乃以爲岸商罪誠恐岸商渙散而揚商益以衰足然則此舉以恤商疏引之初心轉爲病商細課之儆政矣惟治船戶以應得之罪而勿問岸商情事始平大局保全非細俞運使月來病勢初服鎮江李生方頗效頃乃變爲泄瀉殊覺支離實堪憂慮并以附聞

與張子畏太守書

各岸商鹽滯銷乃目前大患其病固由鄰私梟私之侵越而船戶沿途夾帶腳私亦難保其必無聞西省委員掣獲船戶夾私一案已經足下通稟究辦俾船戶知所儆畏免

侵正引具徵偉識精心深堪欽佩惟其中委曲情形有未可不告知足下者自來商人辦鹽與船戶載運皆避西趨楚每當開緡派運商人苦求免派西鹽運司特優勸而調劑之如現在派西吉者貼以江運暢岸是也船戶不愿受載西鹽各商皆格外津貼之故楚路遠水腳每引一兩二錢西路近水腳每引乃一兩八錢是也此其爲故何哉蓋西鹽年額二十七萬餘引實銷不過二十萬而岸費幾四十萬金鹽數少而按引分派成本重於楚省故商情苦之船戶載運楚鹽皆直抵漢岸就船售賣鹽無拋撒西鹽行抵青山卸載起駁運省上倉層層拋撒所費已多而岸商丁友不無挑剔船戶是以有門倉之費始則出於水腳久之水腳盡以自用而取諸腳私所云九十三兩者卽此費

千引千包者亦卽此費也不但岸商明知之卽揚商亦明知之否則非取引鹽抵費卽莫肯受裝蓋引鹽一上江船則鉅萬資本懸於船戶之手卽押運商厥亦情單勢孤常懷不測之懼船戶中途收私盜賣亦無敢如何商人自顧成本不能不委曲將就也岸商不能禁止門倉之費固非謂其通同牟利則過矣惟足下細察之

與姚春木書

春木先生足下昔嘉慶中家惜翁在鍾山日足下數從游處瑩獨伏居里門偶至江甯翁爲言足下未嘗不稱善也惟異之伯言時與往還且久最後得交生甫又聞於他處見足下小文數首益知所以爲人及學與藝之美歎重於茲有年矣仕宦奔走不及通問至揚州乃聞足下有大夫人之憂計至思一爲言已復省念於古人知生知死之義兩無所附而苦塊之中又不便敷陳文字與夫夙昔之所嚮慕者用是抑鬱且較去年秋李申者吳仲倫二君見願生甫亦在坐中二三英彥先後畢集頗思延致足下而未敢也今且之聞以兩世之交生平所欽嚮幸及同時又在一省揚州距松江五百里耳乃不可一見能無悵歎乎計來而不之復於心尤所不安此所以不能終無一言於足下也瑩無似不能負荷家學卽惜翁文章亦不能仰承百一幸賴足下與異之仲倫生甫及惜翁門下諸君子昌大其言俾文章正軌久益昭朗可謂盛矣瑩雖罷駑豈能不思一奮興乎竊謂文者載道之言其精與博者可得而言之不可得而盡之而言之炎炎又不如行之慥慥諸君子

立身自有本末文章所發皆大遠乎今人而津津與古會
瑩自訟時有未足大懼不克自行其言獲罪於君子以是
不敢有所論述然遇有道君子未嘗不忻忻受益如足下
者安能不有以教之乎行至嚴州生甫相送及此與登釣
臺喟然思子陵之風又弔文謝二公之義益念平生交游
因致此書託生甫道其拳拳

與毛生甫書 己亥四月

去冬得兩書並詩冊及李申翁書悉近狀窘乏而僕六月
發書竟未到繼知其船遭風是時方辦賊事未再作問今
歲又兩得手書方喜與練立人相處何意立人暫輟任去
現計吳中無復可託爲足下計者陳梁叔嘉禮雖成而困
於山左海外人無從著力蘊結曷已僕在此心事亦殊惡

劣聊爲言之臺本沃土其民士多富而好義乃自道光六
年械鬥十二年張丙作亂兩用大兵十四十六兩年亂民
再擾閭閻元氣蕩然有司亟謀善後修城建倉積穀一切
派捐民閒復興建考棚動輒數萬創痍之後其何以堪又
前此嘉義被圍時官借紳民數萬金事平不償前守某復
呵責之以是富者疲於捐貲義氣亦衰此民之困於人者
也臺人皆食地瓜大米之產全爲販運以資財用比各省
皆熟米客不至臺人苦穀有餘而乏日用富家一切興作
皆罷小民無從覓食盜賊益多此民之困於時者也地方
官辦公全賴錢糧正供羨餘今以民間缺用雖大稔之年
而賦貢不前追呼所入十裁六七富歲民欠轉甚于荒年
此官之困於民者也自張逆亂後賊黨一萬數千人散在

東漢文後集卷之六
三
民間時思嘯聚五六年來搶劫殆無虛日有司捕盜全賴
懸賞購線破獲一案費數百金而歲常數十案此官之困
於盜者也臺鎮自張逆亂後倡練精兵之議此正務也而
練兵經費每歲取之官捐文自道府廳縣捐萬金武自參
游都司供用亦數千金卽如僕每歲亦捐千六百金按季
送給否則有鼓譟之虞臺鎮每年南北兩路出巡皆以重
兵數百人從所過廳縣供費自一二千金至二三千以爲
例此官之困於兵者也官民之困旣如此矣而更有危亂
之憂張逆餘賊皆無業之游民也迫之則立反置之則日
事劫掠去歲春夏間嘉彰地方忽有樹生刀槍濁水澄清
之異民間以爲亂徵其勢岌岌臺鎮練兵雖勤而不得民
心卽諸營亦頗怨之以重困之官撫重困之民將驕悍之
兵而處必反之勢此所以到任後日夕籌維不能安枕者
也除患必先固本惟有躬行儉約以清治原裁減各屬供
應去其陋規之甚者以紓官力撤轅門差事一切署中自
備革去道役例差之病民者停諸工作興舉之科派勒捐
者以蘇民困根本旣固然後督飭有司急捕巨盜九十餘
人悉置之法閭閻稍安然匪徒甚眾策其反謀未能已也
乃請于督撫行聯莊收養游民之法使嘉彰二邑各莊頭
人查其本庄少壯無業而惰游者除常爲亂首或大盜殺
人正凶三者不赦外餘皆免究籍其姓名年貌以爲莊丁
由本莊贖錢養之使巡守田園逐捕盜賊頒示委員周歷
諸莊自七月至於九月所收游民八千有奇略以兵法部
署之由是賊黨皆爲義勇其勢乃衰及九月間北路賊將

起親至嘉彰一路督營縣破獲在地誅之南路賊起亦飛
飭縣營馳往破散兩路擒斬逆匪積盜二百數十人地方
安謐未有蹂躪最後中路賊起臺鎮白將兵出賊皆潰散
僕親往軍中督營縣先後擒其渠魁從賊六十餘人鎮軍
復入內山窮搜賊巢獲其山東大王各路亦報獲賊匪百
數十人全臺乃定僕以九月初七日出巡十二月初五日
還郡臺鎮以十一月二十四日出軍正月十五日旋師所
至捕諸反賊摧朽拉枯民自擒獻由其黨先已收爲義勇
雖有倡亂而附和者少故破之易也先後入奏幸免勞師
糜餉殘害閭閻新春以來則比戶絃歌如未嘗有寇者此
去歲籌辦臺事之大略也來書以戢威用恩相勸計此次
先後擒誅賊寇不過四百餘人而收養者八千有奇閭閻
被賊之地無所殘害以此報命可乎足下此時竟安在申
翁能健慰甚去歲七十未有以壽容圖之練明府頃在何
所春木自楚中有書來亨甫不知消息植之仍在粵未歸
去年舍下喪一小女家兄亡兩孫內有一最佳者可悼之
至

與湯海秋書 己亥四月

海秋仁弟閣下去夏到臺灣未一致書以地方多故籌所
以安全之不欲空言瀆清聽負知己相愛之意比幸地方
粗安閣下康濟爲懷識議宏達謹以近日情形言之可以
其商權也臺灣在大海之中波濤日夕震撼地氣本浮動
而不靜其人皆來自漳泉潮嘉尙氣輕生而好利睚眦之
怨列械爲門仇殺至於積世故自孩幼卽好弄兵視反亂

爲故常初不必年歲之凶荒官吏之不肖也而年歲與官
吏亦卽爲亂之隙無隙庶可不變卽有變亂而無所害是
則治臺之術也臺自道光五年閩粵械鬥十二年張丙作
亂當時大兵雖云平定而攻剽搶斬者不過十之一二其
巨魁賊黨萬數千人猶在閩閩時思嘯聚十三年之許黨
成十六年之沈知皆其遺孽也上年春秋間嘉彰道傍樹
枝忽變刀槍之形虎尾溪濁水忽清民間以爲亂兆匪民
所在百十爲羣肆行劫掠臺人所產米糖惟以商販爲利
比歲閩浙皆熟米販不至富人乏用一切工作皆罷游手
無業者莫從得食益有亂心昔人言凶歲多盜不知臺民
固豐年亦多盜也是以下車首嚴捕盜之令捕斬九十餘
人而盜風未已策具秋冬之閒必反非有以解散而安置
之不可蓋若輩自十二年後反謀熟悉其膽愈張更有蠢
動其禍必烈而自來言弭盜者皆以清莊編查保甲爲言
愚竊以爲不可蓋游民散在各莊爲匪尙易捕治一行清
莊則匪人無所容是驅之爲亂矣且大姦倡亂向以若輩
爲羽翼而白官招之卽爲義民與其旣亂而招之何如未
亂而用之若輩爲用則賊黨散勢孤必易成擒矣臺之南
路爲鳳山一縣中路則郡城也嘉義彰化淡水廳皆爲北
路道里縣長嘉彰盜賊尤多彰化民多習鳥槍形勢隔遠
一有蠢動則嘉義及中南兩路皆掣其後前人往往受困
故治臺以北路爲亟而彰化更在所先日夕籌之乃爲聯
莊收養游民之法使嘉彰二邑民莊聯結互守頭人查其
本莊無業蕩游者其贖錢米收養之以爲莊丁數百人之

莊養十數人數十人之莊養五六人或四三人無事則巡
守田園有事則逐捕盜賊刊刻示諭委員同地方官周歷
眾莊編查莊丁年貌名册略以兵法部署之自七月至九
月事竣凡收養嘉彰兩邑游民八千餘人皆勁旅也九月
間賊果四起風謠頗盛兄出巡北路督飭縣營捕斬裁二
百數十人北路遂平南路賊起亦馳檄臺鳳二縣會營捕
獲百餘人鎮軍復出巡以鎮定之南路亦平賊無蔓延兄
以彰化最遠親駐久之無敢動者至十一月中路臺嘉之
匪賊起攻灣裏街汛以有備卻退所召各路匪民已先爲
莊人收養無應賊者營縣馳往賊遂潰再約內山賊出攻
店仔口汛戕兵三人鎮軍聞之立統大軍出剿賊復奔潰
此十一月廿三日事也兄亦自彰化馳至軍中獲賊首胡

布及戕兵之賊十二人先斬以徇兄於十二月初五日回
郡三路皆平大軍仍駐店仔口督捕逸匪入山窮搜擊斬
擒捕百餘人全臺大定正月十五日鎮軍旋師此上年籌
辦全臺之大略也然此第爲弭亂一時之計而臺灣近時
之病固不止此其大者則在乎官民兩貧官貧則心有所
餒不暇遠謀民貧則爭利愈急難與爲善古人云瘠土之
民好義此言地土本瘠之民習於勤儉故無淫佚之思也
若臺本沃土民久習於奢淫富而忽貧常人且不能安分
况海外浮動之區乎以不暇遠謀之官治難與爲善而且
思亂之民必無濟矣夫官胡爲而貧也官賴維民民賴維
物物力耗竭富安從來臺民生財之道一曰樹藝二曰貿
遷及其做也一耗於奢淫二耗於詞訟三耗於械鬥四耗

於亂逆五耗於盜賊五耗並至其竭固宜今欲治之必先富之其道奈何曰養其所以生去其所以耗而已夫民有地自能樹藝民有貨自能貿易惟有擾之者斯害其生苟去其耗則得其養二者雖殊其道一也今吾躬行節儉凡道署中向所取給於屬吏者減之裁之吾不擾吏然後可使吏不擾民凡奢淫之事以漸禁止所謂耗者去其一督飭所屬勤理獄訟不能無訟也惟速結之所謂耗者去其二一縣千數百莊莊有董事十數董事舉一總理理之董之能無械鬥者有賞鬥者有罰所謂耗者去其三周防於未亂之先迅辦於為亂之始善籌於既亂之後所謂耗者去其四家自為守人自為保無業者有以資生為盜者即行捕治所謂耗者去其五去此五耗民乃可生生得其養比及十年富將可復治臺以此其庶幾乎夫治國比於亂絲必得其端不得其端益滋勞耳非善治也愚見若此質之足下幸有以教之計足下補戶曹久當有轉遷由京察而外簡庶可以行其素志利濟民物日跂望之

上督撫言全臺大局書 庚子四月

臺灣孤懸海外南北綿亙千數百里地氣本浮人心好動命盜案多甲於通省分類械鬥變生頃刻布謠脅惑謀逆造反習以為常治理弛張之道與內地迥不相同南北兩路情形又與郡城大異蓋郡城有鎮道府重兵鎮守姦民尚知所畏嘉彰一帶毘連內山為匪類淵藪隨捕隨聚誅不勝誅且若輩視死如歸地方官駕馭稍失其宜即激成大案自康熙二十二年平臺以來迄今一百五十餘年姦

民倡亂數十起大半起於嘉彰而南路響應統計全臺之勢嘉彰兩縣既要且繁最稱難治臺鳳兩邑稍次淡水廳又次之噶瑪蘭爲山後新開之地離郡城十三站險阻崎嶇鞭長莫及解犯提案甚費周章幸地止彈丸尙稱易治澎湖廳孤懸海中戶口不及十萬地瘠民貧命盜案皆歸臺邑承審澎廳不過勘驗捕犯而已是蘭澎二廳皆要而不繁至於海洋風帆靡常文報解犯不能與內地一律稽程有兩船同時開駕一船先到一船遲至數月者有數船同開眾船皆到一船漂無下落者卽如現在委員王豫成船漂粵東王鼎成身遭淹沒淡水劉丞四船赴任兩船遭風淹斃幕友家丁舵水數十人涉海之難此其明證所尤慮者臺灣在昔頗有沃土之稱民多曠土可開官亦寬大

爲政是以地方遇警官民趨事赴功皆不致竭蹶自嘉慶以來地利盡闢野無曠土生齒日繁民無餘貲情形已不如昔至十一年蔡逆擾亂南北騷然繼以十五年漳泉分類械鬥民日凋敝幸自十六七年至道光二三年地方無事閭閻稍安及乎四年鳳山則有楊良斌之亂六年有閩粵分類械鬥之亂十二年有張丙之亂十三年有許戢成之亂十六年有沈知之亂十八年又有張貢胡布之亂大兵數動官旣倉庫空虛民亦瘡痍滿目惟冀休養生息閭閻或可稍安而大亂之後遺孽猶存盜賊紛紜民之困於劫奪者一歲屢不登民之困於口食者二商船遭風歲常十數貨物傾耗民之困於財用者三昔之富商大戶存者十無二三是以詞訟日繁賦多逋欠元氣益蕩然矣民困

東漢文後集 卷之六
既甚官卽隨之不惟缺分疲瘠迥異曩時而軍需捐攤數
加無已近者臺鎮奏練精兵文員歲捐盈萬每年出巡南
北兩路地方不靖勢難少帶弁兵亦難拘定月日夫馬口
糧地方供頓不貲逆案盜案人犯歲常數百解內地者亦
百十餘名每獲一犯懸賞自數十金至數百金而流罪以
下例解內地重洋遠涉每一犯需費番銀四五十不等
嘉彰二邑最多歲費鉅萬今更查辦鴉片煙案人犯不可
勝紀而調臺廳縣又時挾虧短而來以內地之不足取償
海外展轉挪移皆所不免每至交代無不棘手揆厥所由
非盡官之不肖也夫以浮動好亂之地當官民交困之時
爲政之道似以撫綏爲先而緝捕更不可後捕犯解犯非
費不可職道上年密陳前憲欲照淡水廳拳和官莊之例

奏明蘭廳未升科糧地畱爲全臺緝捕經費使各屬辦案
有資可免畏難苟安收弭患未萌之效此亦目前要務也
昔年臺餉除抵扣外司發常十七八萬少亦十一二三萬近
年扣款過多撥亦愈少及本年只發銀六萬餘兩而兵丁
逾萬官弁數百人刻不容緩府中無款可籌則以各廳縣
應解之款劃抵使就地支放而各屬應解之款非虧空軍
需案內尙未補足卽民欠無征支絀萬狀民間亦生意日
蹙富室凋零遇地方有事裹足不前海外情形隱憂甚大
前者程督憲按臨臺地奏撥銀十萬兩貯道庫以備急需
沈胡兩逆案皆動撥臨時幸免周章而仍無補於全臺元
氣現在各屬無事之時已形竭蹙一朝蠢動勢必束手無
策此職道所日夜隱憂也海外安危關乎全省職道才識

東漢文後集 卷之六
短淺惴慄實深緣奉查詢地方不敢有所欺隱伏惟憲臺
按切地方事勢籌示機宜撫凋敝之民生咸安衽席俾愚
蒙之下吏得有遵循全臺幸甚

覆鄧制府言夷務書 庚子五月十二日

瑩以庚寅之歲皖江趨承節署得侍誨言自奉職江南雖
數有陳辭未盡私曲丁酉冬忽蒙 聖恩擢昇海外監
司戊戌夏閏受事時當巨逆甫平遺孽遍地各屬元氣虧
竭病楚百端兼之大案異災層出疊見妄意民情浮動之
區撫循瘡痍必鎮靜爲培養誅夷羣醜惟急務之先圖海
外安則內地亦安庶幾上紓 九重之憂下蘇吏民之
困不敢以細故操切致有方劑悞投之悔也一載後有名
巨寇以次獲誅閭閻喘息略定而大府新更未蒙以地方

下問正恐區區無由上達今春二月欣聞世叔大人移節
浙閩不覺以手加額謂海外從此可幸安全上報 天

子矣顧以憲節尊嚴不敢未及而言僅循例稟呈履歷適
准司移知札詢所屬地方與現任各官才具當卽開摺具
復附陳全臺大局情形未識有當高深否方企悚聞茲於
五月九日金守自淡水遞手書至懃懇下逮幾及千言匪
特忠藎之忱昭然如揭且英謀碩畫深切著明欽佩之餘
彌增感歎 聖天子所以顧諟再三東南半壁必倚資
於元老也方今中外汲汲莫不以鴉片夷務爲事矣夷人
數十年詭計一旦爲 天朝燭破嚴定吸食販賣科條
自王公以及士庶輕者徒流重則論死蓋非此不能力去
沈疴振啟聾聵也繼因夷情狡譎絕其貿易有事用兵此

亦事勢之必然者夫英夷以貿易爲生計恃其狡悍脇制西南各島久矣今姦謀旣破不但生計無資且爲各島夷所輕姦謀破則必媿生計繼則必迫各島輕之則必怒灣門馬頭旣失復恐各島素爲伊所據者亦將動搖則必懼兼是四者安得不並力致命於我非有以大創之誠如憲慮未肯帖然就我規矩也則簡練舟師選擇將帥修葺戰艦攻具以禦其外嚴禁奸民杜絕勾通謹守口隘以清其內此誠目前要務矣夷船堅大而便捷師船小者不足以安巨礮其大者水師又以滯重爲嫌來諭詢及王提軍昔造建威船制容往咨訪再以報聞嚮嘗問諸老商云夷船靈捷惟在布篷若師船易蔑爲布節節爲之則轉駛亦靈似可與善海洋者商之也竊意造大艦必先儲費工價非

倍於常例不可而造船之人又必習知洋面攻戰者親督之乃能有用誠能製巨艦十隻或八隻每船費以萬金期以半年當可竣工交提鎮大將領之每艦更助以集成字號及大中號同安梭大白底船數十隻以爲羽翼庶可制敵取勝至於師船用礮不同平地大至千觔足矣通省各營如此者亦尙有之可以簡料而用憲臺自粵中攜至夷礮十數門若更集匠鑄五六千斤大礮以備陸地守口之用似亦非難惟理事廳不諳製造匠人攬和銼砂過多或非一火鑄成或礮內車磨不淨則用時必然炸裂宜得誠實曉事者監製乃可用耳水師懦怯者多風雲沙線尙有未諳何況攻戰然苟將帥得人勤求善者而駕馭之未嘗不可得力竊見前水師提督陳化成操守廉潔節制有方

熟悉海面情形上年曾與夷船接仗雖未能勝亦未敗餉
礮火轟擊之下士卒偶有傷殘此乃軍中常事聞夷人亦
多傷斃落海者似未可以咎之遽與江南對調實爲可惜
計現在水師諸將實未見有更勝之者至於臺灣舊爲紅
夷之所踞誠如憲慮未能忘情此又瑩所日夕深念者夷
船關入必從深水臺灣各口惟大雞籠及滬尾與樹苓湖
最爲寬深其鹿耳門及鹿港近皆淺狹商艘三四千石卽
難收入何況夷船上年有小夷船一隻至彰化之五汲港
外洋面該地文武立帶兵船驅逐並未停畱而去使人量
其汲口亦非寬深恐本地姦民勾引嚴飭營縣查拏鹿港
行舖有買賣鴉片烟者分別搜拏封毀邇來各屬獲辦之
案不少果無勾引之人縱使夷船停泊惟有調集舟師嚴

防口外地方文武督率兵勇堵防口內斷其接濟是爲要
著臺澎水師二協及艦艍營所有師船惟大號同安梭爲
最誠不足以攻擊惟可守口而已一旦有警不得不起王
提軍用之年雖七十有一精力甚強此乃老成宿將但必
假以專權畀水師聽其調度乃能得力此非奏明咨調不
可達鎮練兵甚勤能愛惜士卒惟臺澎洋面二千餘里非
陸營所能爲力必責成水師達鎮專顧地方以免顧此失
彼臺營各口礮位以安平鹿港二處爲多大至一二千斤
者不乏府縣諸城皆自一千斤至二三千斤以上臨時抽
撥未爲不可然師船皆小不足以安巨礮設有大敵非內
地舟師巨艦不能爲力今內地舟師方亟恐難兼顧臺洋
設有來者少則擊之眾則堅守以計破之可也而區區之

愚更有過慮者東南沿海奸民富者出資販賣鴉片貧者出力以小船竹筏爲之運送數十年來衣食於此一旦無以爲生又地方文武查拏不遺餘力紛紛下海爲盜者不知凡幾去冬以來商艘報劫甚多皆若輩所爲也巡洋舟師方調集併力以事夷船捕盜未免稍疎日漸滋多盜船成幫將與夷船合而爲患不能不更煩憲厘耳瑩才質魯下未能思出萬全惟在閩稍久日睹二十年來情形變異深思地方利害之端與夫前人所以得失之故不敢怠玩廢弛亦不敢目前趨利貽害方來以人心浮動之區當兵革數興之後官民交困深以根本爲憂整頓與培養二者不容偏廢而尤以和文武誅盜賊安反側撫瘡痍籌經費爲本計至於嚴烟禁防海口備夷船則更目前要務相其

輕重次第行之幸逢節鉞蒞臨敢竭駑駘披瀝肝膽以聞

與達鎮軍書

庚子八月

弟啟行後於初十日同珊參戎范令到樹苓湖勘視先經文武諸人建有礮墩草蔡礮墩旣低薄而短未能如式又草蔡只可駐札委員鄉勇尙無住處相度地勢酌定事宜十五條同前次查勘安平事宜九條先後備具公牘移知冰案矣十三日到番仔挖卽鹿港外口相距三十里此處入口由內港七里至王功港又二十餘里方至鹿港自以番仔挖爲要口其形勢與樹苓湖大略相同惟口門距岸稍近不過五里耳口門一條沙汕無可立足仍須在內岸防守黃令會同劉游擊在此築礮墩上安大礮三門關護協亦在彼處派兵協防惟嫌其墩稍薄亦須添築堅厚至

王功港係在內港中途其地舊有礮臺上年地震塌壞黃令修整完好此處礮臺外皆淺灘寬約三里方及深水舟行之處臺上礮力恐不能到該文武又在礮臺之南築礮墩一座細加察看恐亦無用此處本汛兵只三十名須加鄉勇百名協防如果臨時緊要再添派陸營兵丁及團練之鄉勇可也應辦事宜已同諸人酌定俟五汛港勘過一並移知惟水師弁兵過少左營雖額設兵丁七百數十名除在安平協防外現在鹿港及番仔挖樹荖湖三口守兵只二百餘名每處皆不及百人雖有船隻無兵可配大敵將來言之實爲寒心二兄雖練有精兵亦不能處處兼顧弟深知鹿港情形總由陳將官平日廢弛營務今幸撤去而劉游擊到任未幾一時驟難整頓當此緊要之際惟有

多僱鄉勇除在岸防守外交本營酌配兵船略壯軍容而已若夷船至則以團練之義勇當之所可慮者左營要口兩處上下洋面三百餘里只游擊一人翁守備新自安平派來其餘千總未見一人把總外委亦甚寥寥不但無配船守口之兵抑且無帶兵守口之弁昨過蚶仔藪見把總龔正興頗爲壯健樹荖湖卽其本汛已經劉游擊派令在口防禦管理礮位此外殊不多得也望二兄商之江護協酌派千把外委各一二人前來帶兵並飭各水師將小汛弁兵盡數調赴海口防堵是爲至囑極知安平根本重地弁兵不敷分撥但北路單薄深爲可慮卽如安平一處前議募鄉勇四百人細思之尙覺不足現在守口每處只二百者以爲日甚多經費無出只能如此倘遇大幫夷船尙

東溪文集卷之六
不濟事昨令各莊總董聯莊團練壯勇該保內有五十餘
莊以上者團練千人或八百人三十莊以上者團練五百
人或三百人聽候臨時調撥半守本莊半聽撥用已出示
札行各縣未審二兄以爲何如蓋守口之兵勇經時累月
銳氣已過非此生力之軍不能應敵也思慮不周之處尙
望指示妥商是所禱切

再啟者前書將發適接兩司來文欽奉

諭旨以臺灣

防夷事務緊要令與在籍提督王某會同商辦欽此除備
公牘移知冰案咨會王二兄外並以附聞弟思前此制府
專函請王二兄內渡而旨意令其在臺自以臺灣緊要
仰煩 聖厪如此王二兄內渡可緩自後一切事宜惟
有欽遵 諭旨辦理既在其事總以協力和衷爲是

兄必能不念前嫌仍尋舊好何幸如之

與王提督書

庚子八月

本月十七日接准司文奉咨之後二日曾布詳函交玉丞
齋呈二十一日奉到惠書知欽奉 上諭之件已達而
前函尙未奉覽承示此時惟協恭同心奉公爲念斷不更
計鎮軍前事足徵二兄忠盡大公如青天白日下懷不勝
欽佩達二兄處弟亦寄函婉商尙未得其回書也弟此閒
勘過樹苓湖番仔挖王功港五汊港各口謬籌辦法因各
處情形稍別是以章程小有不同均經備具公牘同近日
接到省文先後咨移察照大約目前事勢且先議守守備
旣周然後議戰此乃不可易之理臺灣口岸甚多最要者
郡城之安平大港卽四草人郡之咽喉四草難守不知大

東海行集 卷之六
三
港扼要故守四草尤以大港爲重嘉義則樹苓湖卽象鼻湖之下湖也彰化則番仔挖卽鹿港王功之外戶也淡水則八里岔與雞籠二口必分據守之此五者爲最要其次則以安平鹿耳門以北之國賽港大港甚近之三鯤身此又左右輔翼於大港者也三鯤身與大港甚近易守惟國賽港遠而其地沙汕不可立足內埔雖設文武汛房而四面環水兵無退步此兵家所忌也守之不便議侯臨時塞其港若鹿耳門則久非商船之所出入竟以塞之爲是南路惟打鼓港東港二口打鼓本有礮臺距埤頭十里守之尙易東港無礮臺似當設礮墩也北路又有五汊港卽鰲栖港在彰化北境口門稍寬亦當設防此外如鹽水港北港隄仔挖吞霄後隴皆淺水小港惟本地小船出入非內地商船之比有事塞之甚易似不足慮也其守之法莫如多築礮墩於內岸守以兵勇而令水師船守其外口夷船少則出擊多則於內港以俟彼大船不能入也以小船入則非我所畏如不勝而近岸則有礮墩兵勇以禦之彼若登岸則我之所長而彼之所短矣惟守口兵勇日久費大不能多人且恐久而生懈一旦敵至或不能得力故大口水師之外鄉勇只以二百人小口一百人早晚嚴申號令多豎旗幟在港商船亦授以大旗懸掛出港繳回使敵人自外望之不測我兵多少及乎接仗則臨時另以陸營兵往而助之以沿海各莊團練之壯勇昨已發給告示令沿海每保五十莊以上者練千人或七八百人三十莊以上者練五百人或三百人平時編立隊伍造具名冊臨時聽

東海行集 卷之六
三

調半守本莊半出禦敵視敵人之多寡大約非千人不足以戰我平時不用以養其銳臨事然後用之則皆生力軍也故無事則以守口爲正兵有事則出新兵以勝之其港內小漁船亦皆編立字號給印旗爲記朝出暮歸稽查究竟區區之愚所私計者如此未知有當否前因勘視樹荅湖該縣所築礮墩尙未如式令更添築加以高厚寬長並多建草蔡以栖壯勇擬北路回途覆勘未知現在辦法何似得二兄親臨勘視教其不備是爲大妙北路各口亦然俟辦竣尙須並請臨勘也前備文移咨各僚望詳正之

